

卷十三下

人物列傳

卷十四

雜記

考城縣志

丙子清和月

張雪亭題簽

考城縣志卷十三

人物列傳

左氏春秋傳於列國人物表章不遺餘力正以國賴人以成人即以國自見也漢書古今人表有古人無今人猶有遺憾然以九品定人格實史家法義未之能易也顧棟高春秋人物表不悖宏旨蓋史家賢哲並載以昭法戒董狐秉筆太史執簡善有所勸惡有所懲即非國史義例亦同明王啓赤城會通記載官吏分爲三等紀人物有鄉賢鄉僂之異嘉靖時林庭燭等撰廣西通志仿諸史姦臣酷吏傳立奸宄一門萬歷間廣西通志有罪放貪酷兩門皆精於史例不肯徇流俗避衆謗也自是而後古義浸失惟以表揚先哲記載善良爲宗旨其導源自宋樂史太平寰宇記備載列朝人物有美無惡說者即謂史與志體例不同豈其然乎竊嘗論之春秋之善善從長惡惡從短有貶無褒決非聖人與人爲善之意故於光明俊偉磊落雄傑者爲之矜式於豹裘羔袖瑕瑜不掩

者亦無遺焉充類至義之盡也考城人物以兩晉南北朝爲最盛蔡江二姓實爲先進宋梁諸書已有定論後起之英亦復正多茲分爲名宦名臣宦績忠義篤行儒林文苑隱逸方技釋老寓賢列女十一品各爲列傳以著人物之盛雖體猶方志而法義自寓其中也若謂竊取春秋則吾豈敢傳人物

列傳一 名宦

王 奂

燕 肅

吳 祥

秃滿忽都魯

李 茂

方 正

王 理

李 敬

耿世慶

甯文光

馮 尙

杜志晦

湯九星

王用正

崔天印

鄭仰玄

楊啓元

崔德爲

劉愈奇

楊種堦

郭任仁

程夢簡

徐建德

劉際昌

陳憲敏

王大綸

李宏業

徐傳星

雷遜

慶熙

吳拱辰

許晉奎

丁祖和

李璋

趙樹禾

郭藻

呂耀輔以上知縣

冀禹錫

劉膚功

夏體儀

汪彪以上主簿

魏弘

夏德化

李蘭馨以上典史

蔡烜

李烜

曾騰鳳

董世傑

楊獻章

劉泮

王應祥

安如嵩

王宜中

王樂善

王光臬

劉廷詔

張鈇以上教諭

李孟仁

井楚禎

王尙賢

聶舜卿

張大化

朱孔陽

王臣

何六典

張維祥

蔡瑤

郭烜

苑造

楊景時

王辰順

張賓彤以上訓導

附總河二名

楊挺高

栗毓美

漢

縣令王奐字子昌河內武德人明五經負笈追業常賃灌園恥交勢利與外黃范冉親善及令考城境接外黃屢遺書請冉冉不至邑人仇覽少爲書生淳然鄉里無知者年四十縣召捕吏選爲蒲亭長感陳元母子期年大化奐政尙嚴明聞覽以德化人署爲主簿謂覽曰主簿聞陳元之過不罪而化之得勿少鷹鷂之志耶覽曰以爲鷹鷂不若鸞鳳奐謝遣曰枳棘非鸞鳳所棲百里豈大賢之路今日太學曳長裾飛名譽皆主簿後耳以一月俸爲資勉卒景行奐遷漢陽太守將行范冉乃與弟協步齋麥酒於道側設壇以待之冉見車徒絡繹遂不自聞惟與弟共辨論於路奐識其聲卽下車與相指對奐曰行路倉卒非陳契闊之所可共前亭宿息以叙分隔冉曰子前在考城思欲相從以賤質自絕豪友耳今子遠適千里會面無期故輕行相候以展決別如此相追將有慕貴之譏矣便起告違拂衣而去奐瞻望弗及冉長逝不顧既奐徵爲議郎卒

節後漢書獨行傳循吏傳暨謝承書

按考城名宦祠首舉王奐陳志以後漢書循吏傳洛陽令當之改遷洛陽令爲考城令固誤衛輝府志易以王奐而事跡仍屬王渙其誤參半歸德府志譏陳志私改渙傳竟不爲立傳自謂讀史有識豈知齊固失之楚亦爲得乎蓋洛陽王渙廣漢鄴人考城令王奐河內武德人列傳最爲分別陳志不察獨行傳惟斷斷於循固吏傳渙爲一人粗疏甚矣惟王會汾後漢書校刊云時考城令河內王渙按范冉傳作王奐最爲確鑿奐渙古字通詩卷阿篇泮奐周頌閔予小子篇作泮渙是其証也

宋

知縣燕肅字穆之青州益都人父峻慷慨任俠楊光反時率其屬迎符彥卿遂家曹州肅少孤貧游學舉進士補鳳翔府推官寇準知府事薦改秘書省佐郎知卽縣縣民嘗苦吏追擾肅削木爲牘民訟有連逮者書其姓名使自召之皆如期至知考城縣通判河南府召爲監察御史準方知河南奏留之遷中侍御史提點廣南西路刑

獄徙廣南東路爲丁謂所惡出知越州徙明州俗輕悍喜鬪肅下令獨罪先毆者於是鬪者爲息直昭文館爲定王府記室參軍判尙書刑部建言京師大辟一覆奏而州郡之獄有疑及情可憫者上請多爲法司所駁乃得不應奏之罪願如京師死覆奏遂詔疑獄及情可憫者上請其後大辟上請者多得貸議自肅始擢龍圖閣待制權知審行院知梓州還同糾察在京刑獄再判刑部累遷左諫議大夫知亳州徙清州屬歲歛命兼京東安撫使入判太常寺兼大理寺復知審刑肅言舊太常鐘磬皆設色每三歲親祠則重飾之歲既久所塗積厚聲亦不協乃詔與李照宋祁同按王朴律卽剗滌考擊合以律準試於後院聲皆協又詔與章得象馮元祥刻漏進龍圖閣直學士知穎州徙鄧州官至禮部侍郎致仕卒肅喜爲詩其多至數千篇性精巧能畫入妙品圖山水罨布濃淡意象徹遠尤善爲古木折竹嘗造指南記里鼓二車及欵器以獻又上蓮花漏法詔司天台考於鐘鼓下云不與崇天歷合然肅所至篇刻石以記其法州郡用之以候昏曉世推其精密在明州爲海潮圖著海潮論二篇

宋史

按載肅事蹟不盡闕考城然傳明言所至刻石以記其漏法其於考城亦必如此且所治多刑律樂律尤爲民者所慎重故備錄之

知縣吳祥真州揚子縣人從進士試屢不中年四十餘中第爲吉州軍事推官歸以選爲開封府開封縣丞大臣稱其材遂爲秘書省著佐郎知考城縣罷官歸卒曾鞏

碣其墓

元豐雜稿

元

縣監禿滿忽都魯至元間監考城修文廟功完刻碑廟前尋沒於河紇石烈爲縣簿尉與監協修亦勒於石

碑志

縣尹李茂元統間爲考城縣尹重修文廟創建東西廡又廟向無祭器時博平陶師鄭野塘者精是術遂準三禮圖專人持錢六百緡買於鄭其罇罍簠簋豆鼎爵之具凡三百六十事有奇自茲薦獻有所而肄習有序矣

元翰林張琬重修文廟記

明

知縣方正山東高密人監生宣德間知考城寬刑薄賦守法奉公時徭差煩重富室多以賄免貧民苦之正均其役人情歡悅陞大理寺評事去祀名宦

陳志

知縣王理陝西同州人進士正統間知考城居已沉靜處事敏捷邑民好訟矯誤呈稟以陷善良理長於摘發無情者不得盡其辭境內大化在考九年陞刑部郎中祀名宦

陳志

知縣李敬山東館陶人監生成化間任清慎嚴明吏民畏服嘗修學宮掘地得錢盡充公用不勞民財事成去祀名宦

陳志

知縣耿世慶山西蔚州人嘉靖間任賦性嚴明處事周悉禦水變勤月課邑人感之

陳志

知縣甯文光字子謙別號漸齋江西浮梁舉人明嘉靜間知考城辯論竦直操履端方初洪武永樂間詔河南開墾荒田永不起科考境黃河屢遷豪黠吞併灘地杞縣

人因入墾田得八百餘頃宣德時朝廷收其地起科徵解景泰中劉鵬恐爲考之害
奏歸之杞於是種地在考納糧於杞考之空糶爲累甚鉅且是時城係土城矮且薄
歲久傾圮四門上土屋一楹難資捍禦城內往往有劫庫攘民案文光聞之歎曰爲
治有體當急所先田賦不均民何以堪城郭寇何以禦即以一地二糧狀洞陳司府
抗疏兩院百折不回以求必伸久之得旨奉巡捕合勘糧歸杞縣地歸考城三十年
鉅害一朝除之若夫城則增之使高培之使厚雉堞悉易以磚四門上各建層樓森
嚴整齊賊人喪膽劫奪之害去其他均地畝汰冗費築隄防減籽粒過徵之價邑人
皆謳歌之文光嘗自聯云鬼神知我無私曲禍福由他自去來邑人董漢儒贈詩云
烈士心無愧清官氣自高及去民立生祠於學宮祠之

本縣前按均地修城記

按舊志載杞考壹地貳糧文云考距杞百餘里中隔州縣有二杞地在考事屬不
經緣考地濱大河先年多退灘荒土杞人以境外來墾亦通例也後竟詭報新墾
之考城地三百餘項註杞圖籍名曰新增地米而考腹裡之田土稅糧遂駕空而

入杞矣及考履畝均稅前地仍在丈量之內而糧又再入考矣此壹地貳糧所由來也明御史顏某具疏詳陳終未剖晰今地屬在考糧仍納杞雖免壹地貳糧之累然編戶在考耕耘屬杞究爲未便姑志之以俟他日歸正云據此當文光當日僅爭壹地貳糧耳而編戶仍未釐正也

知縣馮尙湖廣江夏舉人萬歷間任居官簡易深得民心爲立生祠之

詳志

知縣杜志晦字相賢山西蒲州舉人萬歷十二年知考城悉心民隱百廢俱興考邑稅法有田賦丁役土貢名目繁多民人苦之志晦用一條鞭法將丁役土貢等悉併於田賦計畝徵收閭閻不擾縣城乃正德間徙葵邱時所築至嘉靖已數十年傾圮不足資捍衛志晦率衆修葺成四門皆易新額內東曰葵邱旭日南曰葛堽曉翠西曰木鐸遐風北曰河帶凝春外東曰東夏咽喉南曰中州雄鎮西曰西京藩衛北曰北門鎖鑰時大吏飭各州縣立名宦鄉賢祠修縣志志晦聞命即具文稟曰賢宦之祠所以報先啓後誠盛舉也一邑之志所以鏡古鑒今最要典也二者何地無之本

縣原未建祠雖有賢宦請入何所邑志殘缺賦役人物何從考徵是不可不創修也
卑職到任思欲查議申請建修間續奉明文查舉二事關係學校卑職難以遽申屢
行本縣儒學查議去後至萬歷十三年二月十五日方准儒學牒呈回稱查得名宦
鄉賢從祀先聖血食無窮關係匪輕考邑自建學以來二項人物後先相望迺久缺
祀典殊乖政體今蒙倦倦催取興舉遂令廩膳生員李講等考史籍咨父母得名宦
鄉賢各三人又查文廟宮牆之東有原立號房三所每所五間以被天雨連綿墻垣
傾圮磚木頗存相應改建名宦鄉賢二祠量加修葺固不至傷財勞民而廟貌維新
且令諸生講訓其中而仰止之心油然而生矣再查得考城舊有鈔志出於嘉靖初年
邑人朱光裕之筆其間不無可採以時推之其地理人物山川等項應該增革者未
必無也更會同舉人孫洙等逐一考究名宦如王奐李敬祭紳鄉賢如仇香蔡興宗
江革人品行實委係年久論定名實相符無容別議堪應入祀其修志建祠之事動
支條鞭銀拾兩九錢四分其學田銀數修志應用若干估計明白修理事完徑自各

另册報仍具由申以憑查考大府許可即建名宦鄉賢二祠延邑中名士分彙纂緝
重修縣志書成爲卷四爲目十二自序刊行之

彙錄陳志

知縣湯九星江西星子縣舉人萬歷間知考城廉靜寡欲擅幹濟才築城垣墊街道
境內荒田使民開之更修葺學宮暨城隍廟不費民財百事就理乃廉而有爲者祀
名宦

陳志

知縣王用正字山西陽城縣人萬歷間由舉人謁選得考城性正直不肯媚權
貴考濱大河歲患水民貧賦重尤失均者爲夫馬民坐是益窘用正剔其弊平其役
歲省以三千計明舊例田沒於河皆免租詭者多託地於河用正詳核之得濫免四
百餘頃當時有水寇橫甚吏不敢捕用正身冒矢石卒禽而斬之四境之無良者悉
籍其主名事發則重創焉凡孤村爲之歸併奸暴斂迹大河在考境內不時漫溢恆
患荒歉用正命河工於春時多備壩埽有險即修之每歲至秋令積粟於倉倍於他
日民恃以無恐嘗謂民貧由於官貪官貪由於不知節儉乃於馬步兵之仗銀入覲

之路費行戶之官價訟獄之拘攝悉裁改之衣食既足即興禮義立課士法季試文朔望試講十日一課豐供設第高下賞勤勞立鄉約法聘鄉先生及耆民有行者表率之數入約面爲勸諭考俗續蒲者鬪鷄走狗者男女雜集寺觀會登泰岱者貨戲具者小兒投桃擊培者雜沓續紛恬不爲怪用正壹是嚴禁民風丕變政成臺察下之八郡令爲儀型甯陵呂坤爲作見陽王侯宜民政畧以記之

節錄去偽齋文集

知縣崔天印號鍾渤山東濱州人崇禎年間以舉人知考城家世科名其父著有君臣事畧下車時家爲賜之其爲政皆闢國計民生之大者舊制生員優免本縣田糧二石該地壹頃八十四畝三分久之漸廢崇禎六年命下復之天印詳請照商例毅然各如其舊時教諭訓導兩署局冷祿薄鮮有恤之者天印捐俸金置膏田五十畝勒誌明倫堂永爲資借且時憂歲科乏人每朔二望六課士公署黜浮崇雅確有得歐陽公遺意他如議賑修防裁冗剔蠹練兵固守刑不貸奸賞必及善善政斑斑可考布政使陸之祺按察使徐沈薦其才可用嗣以調任如職自行辭去邑士甯貫斗

朱廷秀等爲建祀尸祿焉

陳志

知縣鄭伸玄直隸魏縣人舉人崇禎十年知考時流寇蜂起資城捍禦昔之土城歲久傾圮益不足恃仰玄商於衆曰頽殘土城難以固守不若申請撫憲設法通易以磚庶堅整完固足以禦侮衆欣然樂從申請報可遂率紳民修城鑿池儲守禦備流寇屢遭安堵無恙皆易磚功也陞汝寧府同知

陳志

知縣楊啓元直隸豐潤人舉人崇禎十三年知考城執法不阿百廢俱舉下車即欲修纂縣志值歲奇荒賑災孔急次歲奇病傳染骸骨盈野鄉紳救死不贍益無餘暇助修志書十五年流寇入城聖廟大殿兩廡戟門櫺星門俱被焚毀啓元自愧守土無狀期效一死士民護之不果朝議革職留任啓元益自奮勵即除巨惡逐客兵救難民撫善良城門戒嚴奸細屢被查獲賊不知內容以故不敢猝至當兵戎倉卒之餘好整以暇更修城垣建學宮修葺被焚諸廟徵文考獻重修邑乘書成自爲序刊之既去民爲建生祠繪實政圖惜明季世亂未有舉之祀名宦者

錄自作者城縣志序

按明代知考城縣稱循良者尙有金舜臣顧景祥黃瑀沈演劉麒時世隆朱良黃
雄段綉袁大禮劉體仁王卞章業張敬安民王萬邦王立身王世熙宗孔齊一整
段爲袁程之試諸人惜實政無考附識於此

清

知縣崔德爲字聖之山西忻州人順治初知考城邑濱河官差往來索渡如織吏胥
斂民錢以供役民船苦之德爲捐錢設官船二隻一時稱便時兵燹之後民戶稀少
德爲招集撫綏五閱月而四方來集者千餘戶績報稱最六月以病歸德爲性仁慈
每用刑輒淚下然法所應爾決不少貸解組後有勢紳歐斃人命以賂請一言解脫
正色拒之邑人至今猶能道其逸事

新增歸德府志

知縣劉愈奇字會遠山西大同靈邱人其先世家沛之豐縣始祖忠元時爲邊帥僑
居漕川遂爲靈邱人自忠至愈奇凡十五世多以武功顯愈奇童時讀書知大義好
兵機多智勇有烈祖風年十五從數騎出獵大兵奄至突驅以去及世祖入關愈奇

從之順治七年以戊子鄉貢士選河南考城縣知縣兵燹後大河以南荆棘滿目狼
躑狐矢適成窟穴考城遭高許之變凋殘尤甚學宮城垣僅存敗址日夕即聞鬼哭
愈奇下車立法開懇蒙茸化爲膏壤民有可耕之田且延僧道奏梵樂禳祭冤魂鬼
哭始息考邑大堂昔名牧愛堂明季流寇焚毀愈奇至即重修之易名公廉堂葵邱
有驛東通徐西達汴往來冠蓋絡繹不絕迎送供應頗爲邑人累順治八年力請徙
治睢境是年修明倫堂次年修聖廟又次年修啓聖祠學宮告成邑中漸聞絃誦聲
當是時曹鄆有榆園賊王四者時入爲患愈奇諭使降王四謬爲大言曰公欲降我
當獨自詣吾營愈奇聞之笑曰顏真卿宣諭李希烈郭子儀釋甲盟回紇彼何人哉
遂單騎抵王四營四見之大驚謂其屬曰劉公真神人也卽降愈奇以四見於巡撫
巡撫甚喜即以四爲轅門千總巡撫者吳景道也嘉其治績過人復以開歸兩府久
爲戰場汗萊逃亡終日不見人煙非愈奇總治之不可特設一官薦爲兩郡興屯同
知命下考之父老子弟千百爲羣哭告若狂攀轅不可得遂留愈奇子姓一支於考

以作甘棠之愛置鄉村曰官庄著有考城志未成去累官四川保寧府知府吳三桂反死之諡忠節蜀平川豫路通其子清寧清琰與孫相等扶其櫬發自川中乙卯抵考葬於邑南王家橋北遂家焉

節錄梁省學愚齋文集

按陳志稱愈奇強於政改驛站除私派開荒田免輸金屏火耗豁解役重整文廟復舉鄉飲士民愛之立石頌德其善政尙多特附記之

知縣楊種堦山東掖縣人順治間知考城開懇荒田以劉愈奇修考志未竣繼成之尤長於詩歌

陳志

知縣郭任仁山東陽穀人順治間署考城性仁厚優於文學刑清政簡有犯法者每哀矜勸諭之捐金修學宮纂修邑志士民感之

陳志

按郭志久佚

知縣程夢簡字蒼孚江南鎮江府丹徒縣人進士康熙間知考城精明寬厚撫字多方公餘最樂談文較童子試語人曰吾所賞拔科甲人物也後王貫三果捷南宮王

旬果領鄉薦識鑒大率類此外境奸民計侵考邑民田夢簡立法痛懲積患遂除莅

任未久丁艱不能去邑人王明傑割田十頃畀之

陳志及追思王公碑

知縣徐建德字念修山西大同府威遠衛人歲貢康熙間知考城遇事敢爲豪惡斂跡邑人累於河地貧苦莫支即給牛種令耕穫公私攸賴邑有察院因兵火久廢更爲創建不費民財

陳志

知縣劉際昌字盛斯正藍旗人舉人康熙間知考城性剛方寡言笑處事明斷迎刃而解鄉有盜警親率健卒乘夜擒獲由此羣盜屏息復捐俸修聖廟大殿兩廡手題至聖木主既陞雲南曲靖軍民府馬龍州知州

陳志

知縣陳憲敏字訥生山西平陽府猗氏縣人進士康熙三十六年知考城性廉和刑清政簡民賴以安蒞任時弟煥翰同年友柘城竇克勤賀以詩云冰署黎光午夜催常從仲氏和歌來文章繪就五雲色鸞鳳驚非百里才官取撫摩由學入行逢道路見花開葵邱好是河陽地一片霞光變草萊考邑志創始於明永樂景泰間續修之

天順間教諭蔡紳萬歷時知縣杜志晦崇禎間知縣陽啓元皆續修之明季世亂無一存者清順治間知縣劉慇奇悉心訪求乃得楊志於漁陽塾中彙集編次目仍其舊加增續焉未竟去付其事於教諭某知縣楊種堃繼之考志由是有成書矣意敏以名進士來考適值大府促修邑志即延考之賢士大夫刪定楊志而增修之大旨歸於協輿論濟民生志成李國亮韓同春邑人王貫三王旬兄弟皆爲作序其志迄今猶存

採訪

知縣王大綸字慕盧湖廣麻城人康熙四十四年歲乙酉舉於鄉己丑成進士戊戌始謁選河南新鄭知縣丁未調考城河南爲黃河所經辛丑河決巡撫委大綸赴楊橋收塞河物料四百餘萬旬日而辦旋委修詹家河隄百餘丈一月成壬寅冬河復決役夫三千人以久役遁大綸方奉命催物料因捐資募之民素稔大綸德應期集終事無逸者署洧川時前令所築隄三百八十三丈費竭而隄不成大綸至兩月成之自鄆陵迄鞏縣民以不病又築城外雙鬚河以捍南門河道總督稽曾筠嘉其能

調大綸考城縣以其地尤濱河而大綸習河務也大綸吏勤而不廢毫翰著有列朝
史說杜詩新解先儒格言離騷瓶注算法指南吾廬草八卷公餘紀事二卷北行紀
程燕台漫興秋省紀事密署吟河干草各一卷雍正七年己酉內遷中書科中書舍
人明年三月擢貴州道監察御史協理浙江道事又明年卒

李徽貴州道監察御史王君墓表

知縣李宏業字西銘江南江都人雍正十二年知考城有政聲老致仕歸揚州商邱
高岑送以詩曰驪歌相信暫追歡柳陌輕風送薄寒八載政成留雪苑三春又別去
江干爲盟鷗鷺原知己想到湖山好罷官須記剪燭深夜話酒邊月影過花闌

高岑詩

稿

知縣徐傳星字白榆江蘇昆山縣人清刑部尙書乾學之孫以乾隆二十年知考城
當是時豫中連歉梁宋陳許尤甚天子惻然軫念發帑數百萬并檄江楚二省移其
積貯水陸奔救使行部者布置無術則百萬生靈終不免於溝壑矣傳星蒞考年方
四十其母趙氏訓之曰吾家世受國恩今汝爲親民之官荷賑恤重任務竭心力使

人人均霑實惠乃所以報國也傳星聞命悚然經營措置民賴生全若不知戴國之大飢也者皆以徐青天呼之賑務畢邑中利無不興害無不除善政種種洽於民心尙書爲文章宗匠海內名公卿咸出其門士林仰之如山斗傳星傳其家學善屬文考邑碑版多出其手尤膾炙人口者爲重修玄帝廟鐵碑云節錄學忠齋文集

知縣雷遜乾隆四十八年知考城時河督阿桂以考舊城屢遭河患官民皆居隄上奏請移縣治於埧陽集以河南岸七里與睢州以北岸十里與考城得旨委畢某築新城未竣遜繼修之次年成顏東門曰朝陽南門曰迎薰西門曰安瀾北門曰拱辰即以舊隄爲郭濠浚之及泉水嘗深數尺環遶城下植以芙蕖每盛夏花開紅白相映不減許昌小西湖云參用衛輝府志

知縣慶熙漢軍鑲藍旗人某親王教習嘉慶二十五年知考城軫念民依不畏權勢割免一切雜派時河督居魯往來供給民不堪擾慶乃抗不支應致當事者改道相避民賴以安有暇即步履鄉村與父老講習農桑若道家常官民一體毫無隔閡道

光三年以虧欠過多撤任請假歸京復出治某大邑

採訪

知縣吳拱辰浙江石門人監生道光四年正月署考城廉幹有爲力行善政茨蓬村迤西爲豫東大路舊有黃河故道夏秋積水汪洋車馬輒阻吳倡捐創築磚橋三孔長一百餘丈栽柳百數十株行人便之且以考境毗連三省盜賊滋多撫憲奏准添設遊擊守備等員未及建署吳乃詳請帑項依次創修衙署兵房教場演武廳并於署旁卜地修三聖廟三楹以崇祀典閤營官弁頌德焉道光八年十月以陞任去

採訪

訪

知縣蔡鴻翥字夢塘道光九年正月署考城次年去政績無有存者士論惜之

知縣許晉奎原名榕俊字逸南廣西臨桂縣人初生時父夢江文通來拜且告曰吾欲還鄉驚寤僕報夫人生公子矣乃悟晉奎文通後身也長父嘗以還鄉夢告之中道光元年舉人大挑知縣候補河南歷署湯陰濬縣內黃武安等縣二十八年調署考城憬然曰文通還鄉之夢驗矣考吾桑梓也苟不盡心何面目見邑中父老乎下

車即語之故由是邑人無不知其事也者當是時海內承平文恬武嬉法制頽弛教士尤奉行故事毫無實意晉奎力矯其弊更立課士法每月試士坐臯北上爲講陳經史精義獎勸誘掖無所不至旣旣學子咸思振奮得許虎變李正修汪霖雨李慎許葦諸人或舉鄉試或捷南宮考邑人才於斯爲盛在職六年陞湖南長沙府同知未赴任以疾卒葬考城東南三里

探訪

按輪回之說見於古籍者頗多不得謂盡無其事也今觀晉奎生官於考卒葬於考何巧值若是其有夙因無疑存之以俟精於生理者研究焉

知縣丁祖和浙江會稽舉人咸豐五年十月署考城下車後即歷田間問民疾苦考課士子手自批評獎勸誘掖無微不至終日危坐堂上推求幽隱務使案無滯牘人無冤獄考邑下六地方去城百餘里訟事諸多不便乃於每月初一十五日親詣舊城接呈詞有鼠牙雀角之爭輒就地訊結訟事由此漸簡兩任未及三年以陞任去

探訪

知縣李璋字厚餘江蘇常州武進人監生同治七年山桐柏縣調署考城性嚴峻人不敢干以私不辭辛苦不畏艱難四月下車九月修文廟文昌宮十月修武廟十一月修江花書院成記之曰江花書院廢弛將及百年本邑生童久失肄業之所曷以培士氣振文風繼江郎之才調哉戊辰孟夏余捧檄即念切創修而苦無經費先行在署按期設課諸生見余之存心教育也遂皆踴躍輸將請爲作主重建書院余亦欣然樂之不惜分廉共襄盛舉於七月七日經始十二月吉日告竣自大門講堂書齋以及兩廊考棚山長住室共計五十六間棹橙悉備從此龍門大啓馬帳高懸勤月旦之評勵雪窗之志詩書化及愚魯道德發爲文章將見窮與達各有其操富與貴皆知仁讓風清俗美永爲禮義之邦豈徒錦繡藏胸彩毫在手繼江郎之才調而已哉故樂而志之八年二月修城隍廟三月修河大王廟由是輿情大洽頌聲遍野士商爲立德政碑畧曰禱除狼患赤子沾惠疏濬潢汙黃雲遍野造橋梁以利車馬嚴捕緝以福閭閻查保甲以清盜源懲訟棍以安民命皆實錄也既去邑人猶謳思

之錄文廟暨諸廟宇碑

知縣趙樹禾江蘇丹徒人由翰林改選知縣光緒七年知考城才敏學博吏治廉明首重文教下車即出示觀風其文曰士爲民首言乃心聲通經昭致用之材成化協觀文之準雖三升造士器識爲先而八斗掄才文章益重洪維聖代承天出治擲地論文橋流碧水之園萬方仰鏡署起木天之貴六合同風文教昭宣無間於吳頭楚尾文明廣被直周乎趙眷燕唇矧茲花縣古號葵邱河帶黃流迴抱中和之氣門迎翠曉洵爲壯麗之區因川嶽之鐘靈故人文之蔚起莊蒙叟學宗李耳博千秋高士之名江文通筆燦花心擅一代文人之譽孝行純絕范岫堪欽志勵直清劉隨足法緬流風於往哲淵源歷證於後先訪景物於名區毓秀豈分乎今古多士生當佳會業有專門宜符名實之稱以表型之望本縣夙承家學素懷師箴鹿洞披經子史竭鑽研之力鷄窗奮志詩書結繯綬之緣敢云學富山淵差幸光騰奎宿枝攀丹桂曾探玉兔之香餅啖紅綾旋徹金蓮之炬文章舊價經濟新猶恩荷九重司茲百里欲

政平而訟理必士秀而言文思正人心須崇聖學翹材建館平津侯雅意堪師金管
臚勳黃直卿清風快親及茲初莅合亟觀風爲此示仰闔屬知悉定於八月十七日
封門面試爾等束髮受書早切功名之志專心典學期爲淹博之儒各奏爾能務由
己出此日才量玉尺預遜脫白之尤他年墨灑金壺定卜飛黃之快試披佳卷用拔
奇才卽立課程每月一試捐俸給獎期振文風惡惡極嚴刁詐聞風斂跡遇細故詞
訟悉批親故和處間有不聽解勸者一訊卽行判決不延時日兩造皆服稱爲神明
時大府飭令勸捐輒捐俸與之不令民間出欸八年鄉試調簾在汴病故士民惜之

採訪

知縣郭藻字翰亭江西廬陵舉人光緒九年七月知考城端方嚴毅苞苴不行舊城
去縣治七十里士子月課以路遠不便藻卽在舊城倡修葵邱書院令士子肄業其
中每逢課期親臨召試多士嚮往一時文風丕振去職十五年回任士民額慶如兒
童竹馬之迎郭使君也城西北馬穆牛營地勢卑窪遇霖雨卽成澤國咸豐間知縣

丁祖和嘗濬溝使水曲折向東南流入舊河身久之溝淺且狹出水遲緩稍深處不能盡洩上游居民欲深寬其溝而地主不可以此興訟歷年不休藻兩方開導其爭乃已於溝深之寬之俾上游積水一洩無餘馬穆牛營等處從此無其魚歎矣至今故老猶稱道之去任時道經舊城土子祖餞藻贈詩留別詩載雜記中採訪
知縣呂耀輔字仲湘江蘇陽湖人監生光緒十年九月署考城有幹才下車謁諸廟見傾頽過半不足以妥神因商諸邑紳倡首捐廉廣集衆力鳩工庇材擇練達老成李奎璧等董其事首文廟次關帝廟城隍廟胥重修之考邑江花書院修於同治七年至是傾廢士子肄業無所人材日萎耀輔讀詩至青衿篇悚然曰學校之廢有司之責也卽葺牆垣定課程使復其故西隄者考邑防河之保障也非高厚且堅不足恃於光緒十四年申明大府請發給獎勵鼓舞督率辦公人員俾紳民踴躍赴工增高培薄邑人恃以無恐明于忠肅公其先世居考其子復歸謂不可缺其祀典卽創建于公祠明季孫忠者率鄉團禦李自成陣亡謂不可不妥其英魂復修孫將軍祠

其崇拜忠義又如此邑人稱之至今

探訪

金

主簿冀禹錫字京父惠州龍山人幼聰敏絕倫年十九擢大興魁入太學有聲弱冠登第時雷希顏宋飛卿皆同榜號爲得人入仕以能稱遇事風生老吏莫及初主簿沈邱以年少喜交游飲酒遂爲其令所乘坐廢再調考城主簿又以治聞

卽錄劉祁歸潛志

明

主簿劉膚功山東平陰縣人拔貢萬歷間任居官清苦潛遭誣陷士民憐之輸金贖

罪

陳志

清

主簿夏體儀陝西藍屋縣人康熙年間任勤勞河干體恤夫役陞浙江按察司照磨

陳志

主簿汪彪字載林錢塘人國初隱君子胤族子也少有至性事父母爲血心孝子者

四十年與兄友愛以上舍爲考城丞嘗曰官無大小惟職之稱丞不負予予恐負丞故事無大小一出小心在考署其齋曰於是道古政暇究心性命之學歲時祭祀必豐潔每遇生辰閉閣靜坐有祝者輒泫然流涕清冷潔修不名一錢考之人士無不知彰爲好官者一日歸自河上道逢醉客橫臥見人輒罵詈從者呵之醉客張目熟視良久曰汪好人乎崛起肅然拱立當是時兄由內閣除禮部侍郎子侄悉居清要彰在考門如止水其爲人可知彰古文辭質樸可愛詩在陶靖節陸放翁間

節錄學忠

齊文集

明

典史魏弘直隸滿城人監生成化間任邑人張彬夜被殺人莫知其由弘禱於城隍忽暴風猝起白晝晦冥觀者皆走獨一人仆階下訊之乃真殺人者至今傳頌以爲異政

陳志

典史夏德化順天府人崇禎間任性慈祥崇文敬士時盜賊竊發德化偵其巢穴夜

率健卒擒之其患遂除邑有大姓橫肆爲鄉曲害以法治之有義縱郅都風修補城

垣經營河務以能吏著

陳志

清

典史李蘭馨陝西韓城縣人順治間任居官有體御下多恩乃僚尉中之特出者陞

山東東平州吏目

陳志

明

教諭蔡紳江蘇武進人明天順間任性質端潔學行優贍諸生炙其光儀聆其講解文風爲之一變妻卒誓不再娶纂修邑志遺稿清初尙存今則惟序載陳意敏

所修志中卒祀名宦

陳志

教諭李烜江西浮梁舉人成化間任學問優長尤工詩賦改餘姚教諭陞蘇州府教

授加同知俸致仕進階布政司左參議

陳志

教諭曾騰鳳四川成都舉人嘉靖間任爲人渾厚雅有俊才文簡當詩婉麗在任五

載士習改觀陞商邱令諸士至今思之

陳志

教諭董世傑陝西隴州人歲貢嘉靖間任律已甚嚴待人甚恕嘗有疾其子割股療之遂愈詳見宗方城集

陳志

教諭楊憲章山東青城縣人歲貢隆慶間任存心正直處事老成時有督學檄諸生中不檢者堅不與其後督學反愛重之邑人咸曰存心若此後世子孫必有達者其孫名其休果登庚辰進士入名宦祠

陳志

教諭劉泮字賓陽湖廣麻城人舉人萬歷間任品端學純多所成就陞葉縣令士子爲立去思碑於署前文云師惟愛人人不知其所以愛師惟善惠惠不足以盡其大解衣恤貧推食課士更有默爲維持超出尋常之外亥子兩歲士類幾殆委曲回天斯文在茲祀名宦

陳志

教諭王應祥興化縣舉人天啓間任時諸生中有以公務觸怒上臺患將不測應祥極力解救得免邑人德之

陳志

教諭安如嵩確山縣舉人加意修學規制聿新陞陝西真寧縣令旋陞鞏昌府同知

署階州遇亂殉之

陳志

教諭王宜中山東即墨縣人崇禎間任品行瑩潔氣度和藹立法課士文教蔚興時歲饑賑濟貧苦多所全活

陳志

清

教諭王樂善山東范縣人順治間任時經明末兵燹失印記即赴部請印一顆且捐俸同知縣劉愈奇葺學宮彬雅飭躬溫恭接物陞山東萊州府教授

陳志

教諭王光臬字賓虞開封府西華縣人歲貢康熙間任瀟灑能詩尤工楷書創修名宦鄉賢二祠以憂去

陳志

教諭劉廷詔字虞卿永城人廩貢道光十九年任著有理學宗傳辨正十六卷其孫

國輔傳其學

輞軒博記

教諭張鈔尉氏縣舉人道光二十四年任學深養遂以作人造士爲己任與士子講

解經義論說文法窮源竟委終日不倦士子束修受業者甚衆一經指點文思頓進
皆曰讀數年書不如聆吾師一語後汪霖兩李正修相繼領鄉薦其賞拔尤多名
士採訪

明

訓導李孟仁山東齊康人歲貢正德間任邃易學勤於講授補修殿廡不惜俸金時
礦賊王堂圍城誓以死全之率邑人守陴城得無恙事平後迎養慈母人化其孝
陳志

訓導井楚禎直隸河間人歲貢嘉靖間任賦性樸誠不事浮華陞湯陰縣教諭
陳志

訓導王尙賢四川眉州人歲貢嘉靖間任待士以誠陞涇陽縣教諭諸生遠送依依
不忍別
陳志

訓導聶舜卿江西萬年縣人歲貢嘉靖間任立心端謹行事光明善屬文考邑碑版
多出其手陞山東濱州學正邑士至今稱之
陳志

訓導張大化山東歷城人歲貢嘉靖間任居官訓士以勤慎稱陞修武教諭

陳志

訓導朱孔陽無錫人歲貢乾隆間任工書法善談論邑士咸受業焉被裁去

陳志

訓導王臣山西榆次縣人崇禎間任剛方正直見義勇爲到任甫兩月李自成陷城被執不屈死之

陳志

清

訓導何六典涑川縣人歲貢順治間任氣概寬綽識才通明遇事敢言敢行捐俸同

劉愈奇督修文廟尤見經畫

陳志

訓導張維祥通許縣人恩貢順治間任學識淵深有忠厚長者之風

陳志

訓導蔡昭汝寧府商城縣人歲貢順治間任樸素性成言貌不飾得古君子之遺焉

陳志

訓導郭烜字芝田開封府太康縣人歲貢康熙間任器宇恢宏以直道不阿去

陳志

訓導苑造字含粹開封府陳州籍太康縣人歲貢康熙間任脫灑不羈輕財重義訓

導署因兵燹久廢捐俸創修諸士懷之立去思碑於庠門外以誌不忘

陳志

訓導楊景時字道南禹州人乾隆二十七年任幼受書輒成誦及長以忠信篤敬爲學持身接物有古人風汝南全解元軌爲人所擠跡同張儉景時獨客之全有棲身牆壁愧孫嵩之句

錄禹州志

訓導王辰順字耕畬號葵塢西華縣人乾隆戊子舉人性至孝童時聞人談割股療親事輒心動會母病甚情急忽憶割股可療病潛刲臂以進母病尋愈年十七竇光鼎學使愛其才拔冠童子軍及長從張桐岡錢柳圃遊學益進善屬文馮魚山評曰味如醴色如玉如氣之春如人之嬰其心折如此尤好講濂洛關閩之學性理諸書未嘗釋手四十八年任考城訓導訓士先躬行而後文藝未幾調南陽教諭去

節錄中

州詩鈔

訓導張賓彤字竹軒澠池人舉人大挑二等光緒二年任考城品高學邃不樂勢位以教授終身當時大臣袁保恒與賓彤同年嘗勸之爲宰賓彤曰吾非百里才廣文

才也既得訓導喜而後可知也至考未三日即命題課士擬訂課程諸生見者不受
贊他日受業於門者亦不問束修某生賢因訟觸知縣某怒欲除其名移文學官出
結賓形不許親詣署求之又辭不見此生竟得保全邑人稱盛德焉晝夜讀諸生來
即爲講解經史評騭詩文如暮鼓晨鐘發人猛省成就頗多孔子云溫故知新可以
爲師賓形之謂歟遽以四年三月卒次子銘坤遵其遺命權厝署內代教生徒次年
扶輿旋里後成進士授吏部主事咸謂賓形爲善之報云

採訪

明

楊挺高號微齋山東金鄉人爲副總河明嘉靖癸亥大水挺高按歷考城淫雨浹旬
城內積水如湖道路繼絕四郊窪下地秋苗皆浸死惻然憫之親自勘災且運土實
街築爲四隄以利行人邑人朱煌等欲建儒學明倫堂願出金倡捐挺高聞而義之
即飭知縣甘節董其事堂成漢陽朱顥記諸石考人感盛德焉不數年又有張洲號
屏庵鳳陽太和人判歸德府事駐劄考城與知縣王禹邦重修儒學規模廓大土者

磚之水之積者橋之地之鬻於民者贖之街道之如工者士之復建文筆峯以振興文化及嘉靖己卯壬午兩鄉試而寧嘉會陳所聞諸人皆獲雋至今人猶思之

錄朱頤

儒學重建明倫堂記暨常講重修儒學記

清

栗毓美字樸園山西渾源洲人嘉慶六年以拔貢生官河南知縣遷光州知州汝寧府知府徙開封歷河南糧儲道開歸陳許道遷湖北按察司河南布政使道光十五年授河東河道總督奏以甄易石歲省官銀數千萬駐考城甚久購地八百畝以自給卒時以地租爲官紳公費考人感之今猶稱道弗衰云

錄梅曾亮粟勤公傳暨採訪

按考邑名宦祠中猶有馬慧裕武肅趙希璜韓夢周諸人木主蓋皆因治河有功德於考邑者惜其事不傳無由稽查也

列傳二名宦

史 敞

蔡 謨

蔡 廓

蔡興宗

江湛

江斅

蔡約

蔡樽

江淹

江革

江倩

蔡景歷

江大權附

蔡大寶

劉隨

傅求

漢

史敞考城人史弼之父弼另有傳敞為京兆尹有能名漢順帝時以才辯致尚書順帝欲立皇后而貴人有寵者四人莫知所建議欲探籌以定神選時敞與胡廣郭虔同為尚書上疏諫曰竊見詔書以立后事大謙不自專欲假之籌策決疑靈神篇籍所記祖宗典故未嘗有也恃神任卜既不必當賢就值其人猶非德薄夫歧嶷形於自然倪天必有異表宜參良家簡求有德德同以年年同以貌稽之典經斷之聖慮政令猶汗往而不返詔文一下形之四方臣職在拾遺憂深責重是以焦心冒昧陳帝從之以梁貴人良家子定立為皇后時尚書令左雄議改察舉之制限年四十以上儒者試經學文吏試章奏敞復與廣虔上書駁之曰臣聞君以兼覽博照為德臣

以獻可替否爲忠書載稽疑謀之卿士詩美先人詢於芻蕘國有大政必議之於前
訓咨之於故老是以慮無失策舉無過事竊見尙書令左雄議郡舉孝廉皆限年四
十以上諸生試章句文吏試牋奏明詔既許復令臣等得與相參竊惟王命之重載
在篇典當懸於日月固於金石遺則百王施之萬世詩云天難諶新不易惟王可不
慎歟蓋選舉因才不拘定制六奇之策不出經學鄭阿之政非必奏章甘奇顯用年
乖強仕終賈揚聲亦在弱冠漢承周秦兼覽殷夏祖德師經參雜霸軌聖主賢臣世
以致理貢舉之制莫或回革今以一臣之言割戾舊章便利未明衆心不厭矯狂變
常政之所重而不訪台司不謀卿士若事下之後議者制異異之則朝失其便同之
則王言已行臣愚以爲可宣下百官參其同異然後覽擇勝否詳探厥衷敢以瞽言
冒干天禁惟陛下納焉帝不從陳留郡缺職敞等薦胡廣曰臣聞德以旌賢爵以建
事明試以功典謨所美五服五章天秩所作是以臣竭其忠君豐其寵舉不失德下
忘其死竊見尙書僕射胡廣體真履規謙虛溫雅博物洽聞探賸窮理六經典奧舊

章憲式無所不覽柔而不犯文而有禮忠貞之性憂公如家不矜其能不伐其勞翼翼周慎行彌玷漏密勿夙夜十有餘年心不外顧志不苟進臣等竊以爲廣在尙書劬勞不久後母年老旣蒙簡照宜試職千里匡寧方國陳留近郡令太守任缺廣才畧深茂堪能措煩願以參選紀綱頽俗使束修守善有所勸仰廣典職事帝不納

後

漢書胡廣傳

晉

蔡謨字道明濟陽考城人世爲著姓曾祖睦自有傳祖德樂平太守父克自有傳弱冠察孝廉州辟從事舉秀才東海王越召爲掾轉皆不就避亂渡江時明帝爲東中郎將引爲參軍元帝拜丞相復辟爲掾轉參軍後爲中書侍郎歷義興太守大將軍王敦從事中郎司徒長史遷侍中蘇峻構逆吳國內史庾冰出兵會稽乃以謨爲吳國內史謨旣至與張顓顧衆顧颺等共起義兵迎冰還郡峻平復爲侍中遷五兵尙書領琅邪王師謨上疏讓曰八坐之位非賢莫居前後所用資名有常孔愉諸葛恢

並以清節令才少著名望昔愉爲御史中丞臣尙爲司徒長史恢爲會稽太守臣爲尙書郎恢尹丹陽臣守小郡名輩不同階級殊懸今猥以輕鄙超倫踰等上等聖朝貫魚之序下違羣士準平之論豈惟微臣其亡之誠實招聖政惟塵之累且左長史一超而侍帷幄再登而側納言中興以來尙德之舉所未嘗有臣何人斯而猥當之是以叩心自忖三省愚身與苟進以穢塗寧受違命罔固之罪疏奏不許轉掌吏部以平蘇峻勳賜爵濟陽男又讓不許冬烝謨領祀部主者忘設明帝位與太常張泉俱免白衣頡職頃之遷太常領祕書監以疾不堪視職上疏自解不聽成帝臨軒遣使拜太傅太尉司空會將作樂宿懸於殿庭門下奏非祭祀燕饗則無設樂之制事下太常謨議臨軒遣使宜有金石之樂遂從之臨軒作樂自此始也彭城王茲言樂賢堂有先帝手畫佛像經歷寇難而此堂猶存宜勅作頌帝下其議謨曰佛者夷狄之俗非經典之制先帝量同天地多才多藝聊因臨時而畫此象至於雅好佛道所未承聞也盜賊奔突王都隳敗而此堂塊然獨存斯誠神靈保祚之徵然未是大晉

盛德之形容歌訟之所先也人臣覩物興義私作賦頌可也今欲發王命勅史官上稱先帝好佛之志下爲夷狄作一象之頌於義有疑焉於是遂寢時征西將軍庾亭以石勒新死欲移鎮石城爲滅賊之漸事下公卿謨議曰時有否泰道有屈伸暴逆之寇雖終滅亡然當其強盛皆屈而避之是以高祖受辱於巴漢忍辱於平城也若爭強於鴻門則亡不終日蕭何曰百戰百敗不死何待也原始要終歸於大濟而已豈與當亡之寇爭遲速之間哉夫惟鴻門之不爭故垓下莫能與之爭文王身圯於羨里故道泰於牧野句踐見屈於會稽故威申於強吳今日之事亦由此矣賊假息之命垂盡而豺狼之力尙強宜抗威以待時時已可矣愚以爲時之可否在賊之強弱賊之強弱在季龍之能否季龍之能否可得而言矣自勒初起則季龍爲爪牙百戰百勝遂定中國境土所據同於魏世及勒死之日將相內外欲誅季龍季龍獨起於衆異之中殺嗣主誅寵臣內難既定千里遠出一攻而拔金墉再攻而斬石生禽彭彪殺石聰滅郭權還據根本內外並定四方鎮守不失尺土詳察此事豈能乎將

不能也假令不能者爲之其將濟乎將不濟也賊前攻襄陽而不能拔誠有之矣不信百戰之効而執一攻之驗棄多從少於理安乎譬若射者百發而一中可謂之拙乎且不拔襄陽者非季龍身也桓平北守邊之將耳賊前攻之爭疆場耳得之爲善不得則止非其所急也今征西之往則異於是何者重鎮也名賢也中國之人所聞而歸心也今而西度實有席卷河南之勢賊所大懼豈與桓宣同哉季龍必率其精兵身來距爭若欲與戰戰何如石生若欲城守守何如金墉若欲阻沔沔何如大江蘇峻何如季龍凡此數者宜詳校之愚謂石生猛將關中精兵征西之戰不能勝也金墉險固劉曜十萬所不能拔今征西之守不能勝也又是時兖州洛陽關中皆舉兵繫季龍此今三處反爲其用方之於前倍半之覺也若石生不能敵其半而征西欲當其倍愚所疑也蘇峻之強不及季龍沔水之險不及大江大江不能禦蘇峻而以沔水禦季龍又所疑也昔祖士雅在譙佃於城北慮賊來攻因以爲資故豫安軍屯以禦其外穀將孰賊果至丁夫戰於外老弱獲於內多持炬火急則燒穀而走

如此數年竟不得其利是時賊唯據沔北方之於今四分之一耳士雅不能桿其一而征西欲禦其四又所疑也或云賊若多來則必無糧然致糧之難莫過嶠函而李龍昔涉此險深入敵國平關中而後還今至襄陽路既無險又行其國內自相供給方之於前難易百倍前已經至難而謂今不能濟其易又所疑也然此所論但說征西既至之後耳尙未論道路之慮也自沔水以西水急岸高魚貫沂流首尾百里若賊無宋襄之義及我未陣而擊之將如之何今王士與賊水陸異勢便習不同寇若塗死雖開江延敵以一當千猶吞之有餘宜誘而致之以保萬全棄江遠進以我所短擊彼所長懼非廟勝之算朝議同之故亮不果移鎮初皇后每年拜陵勞費甚多護建議曰皇后廟見而已不拜陵也由是遂止及太尉鑿疾篤出護爲太尉軍司加侍中鑿卒即拜護爲征北將軍督都徐兗青三州楊州之晉陵豫州之沛郡諸軍事領徐州刺史假節時左衛將軍陳光上疏請伐胡詔令攻壽陽護上疏曰今壽陽城小而固自壽陽至壽陽城相望其間遠者裁百餘里一城見攻衆城必救且王

師在路五十餘日劉仕一軍早已入淮又遣數部北取堅壁大軍未至聲久聞而賊之郵驛以日千里河北之騎足一來赴非唯鄰城相救而已夫以白起韓信項籍之勇猶發梁焚舟背水而陣今欲停船水渚引兵造城前對堅敵顧臨歸路此兵法之所誠也若進攻未拔胡騎卒至懼子不知所爲而舟中之指可掬今征軍五千皆王都精銳之衆又光爲左衛遠近聞之名爲殿中之軍宜令所向有征無戰而頓之堅城之下勝之不武不勝爲笑今以國之上駟擊寇之下邑得之則利薄而不足損敵失之則害重而足以益寇俱非策之長臣愚以爲聞寇而致討賊退而振旅於事無央下勝管見謹冒陳聞季龍於青州造船數百掠緣海諸縣所在殺戮朝廷以爲憂謨遣龍驤將軍徐玄等守中洲并設募若得賊大白船者賞布千匹是時謨所統七十餘人所戍東至土山西至江乘鎮守八所城壘凡十一處烽火樓望三十餘處隨宜防備甚有算畧先是鄒鑿上部下有勳勞者凡一百八十人帝並酌其功未卒而鑿薨斷不復與謨上疏以爲先已許鑿今不宜斷且鑿所上者皆積年勳效百戰之

餘亦不可不報詔聽之唐帝即位徵拜左光祿大夫開府儀同三司領司徒代殷浩爲楊州刺史又錄尙書事領司徒如故初謨冲讓不辟僚佐詔屢敦逼之始取椽屬石季龍死中國大亂時朝野咸謂當太平復舊謨獨謂不然語所親曰胡滅誠大慶也然將貽王室之憂或曰何哉謨曰夫能順天而奉時濟六合於草昧若非上哲必由英豪度德量力非時賢所及必經營分表疲人以逞志才不副意畧不稱心財單力竭智勇俱屈此韓盧東郭所以雙斃也遷侍中司徒上疏讓曰仗自惟省昔階謬恩蒙忝非據尸素累積而光寵更崇謗譏彌興而榮進復加上虧聖朝棟隆之舉下增微臣覆餗之繫惶懼戰灼寄顏無所乞賜天鑒回恩改謬以允羣望皇太后詔報不許謨猶固讓謂所親曰我若爲司徒將爲後代所哂義不敢拜也皇太后遣使諭意自四年冬至五年末詔書屢下謨固守所執六年復上疏以疾病乞骸骨上左光祿大夫領司徒印綬章表十餘上穆帝臨軒遣侍中紀璩黃門郎丁纂徵謨陳疾篤使主簿謝攸對曰臣謨不幸有公族穆子之疾天威不遠顏咫尺不敢奉詔寢伏

待罪自且至申使者十餘反而謨不至附帝八歲甚倦門左右曰所召人何以至今不來臨軒何以當竟君臣俱疲弊皇太后詔必不來者宜罷朝中軍將軍殷浩奏免吏部尙書江彪官簡文時爲會稽王命曹曰蔡公傲違上命無人臣之禮若人主卑屈於上大義不行於下亦不知復所以爲政矣於是公卿奏曰司徒謨頃以常疾久逋王命皇帝臨軒百僚齊立俯僂之恭有望於謨若志存止退自宜致辭闕廷安有人君卑勞終日而人臣曾無一酌之禮悖慢傲上罪同不臣臣等參議宜明國憲請送廷尉以正刑書謨懼率子弟素服詣闕稽顙躬到廷尉待罪皇太后詔曰謨先帝師傅服事累世且歸罪有司內訟思悠若遂致之於理情所未忍可依舊制免爲庶人謨旣被發杜門不出終日講誦教授子弟數年皇太后詔曰前司徒謨以道素著稱軌行成名故歷事先朝致位台輔以往年之失用致黜責自邇以來闔門思愆誠合大臣罪已之義以謨爲光祿大夫開府儀同三司於是遣謁者僕射孟洪就加册命謨上疏陳謝曰臣以頑簿昔忝殊寵尸素累紀加違慢詔命當肆市朝幸蒙寬宥

不悟天施復加光飾非臣隕越所能上報臣寢疾未損不任詣闕不勝仰感聖恩謹遣拜章遂以疾篤不復朝見詔賜几杖門施行馬十二年卒時年七十六贈贈之禮一依太尉陸玩故事詔贈侍中司空諡曰文穆謨博學於禮儀宗廟制定文筆議論有集行於世總應劭以來注班固漢書者爲之集解謨初渡江見彭蠡大喜曰蟹有八足加以二螯令烹之阮食吐下委頓方知非蟹後詣謝尙而說之尙曰卿讀爾雅不熟幾爲勸學死謨性方雅丞相王導作女伎施設牀席謨先在坐不悅而去導亦不止之性尤篤慎每事必爲過防故時人云蔡公過浮航脫帶腰舟長子邵永嘉太守少子系有才學位至撫軍長史

晉書

宋

蔡廓字子度濟陽考城人曾祖謨晉司徒祖系撫軍長史父緝司徒左西屬廓博涉羣書言行以禮起家著作左郎時桓玄輔晉議肉刑廓上議曰夫建封立法弘治稽化必隨時置制德刑兼施貞一以閉其邪教禁以檢其慢洒湛露以膏潤厲嚴霜以

肅威晞風者陶和而安恬畏戾者聞憲而警虞雖復質文迭用而斯道莫革肉刑之設肇自哲王蓋由曩世風淳民多惇謹圖象既陳則機心冥戕刑人在望則不逞改操故能勝殊殺化隆無爲季末澆僞法網彌蜜巧利之懷日滋恥畏之情轉寡終身劇役不足止其奸况乎黥劓豈能反其善徒有酸慘之鄉而無濟治之益至於棄市之條實非不教之罪事非三殺考律同歸輕重均科減降路塞鍾陳以之抗言元皇所爲留愍今英輔翼潛道邈伊周雖閉否之運甫開而遐遺之難未已誠宜明慎用刑愛民弘育申哀矜以革濫移大辟於支體全性命之至重恢繁息於將來使將斷之骨荷更榮於三陽干時之華監商飆而知懼威惠懼宣感畏偕設全生拯暴於是乎在遷司徒主簿尙書度支殿中郎通直郎高祖太尉參軍司徒屬中書黃門郎以方鯁聞素爲武帝所知及武帝領兗州廓爲別駕從事史委以州任尋除中軍諮議參軍太尉從事中郎未拜遭母憂性至孝三年不節沐殆不勝喪服闋相國府復板爲從事中郎領記室宋台建爲侍中建議以爲鞠獄不令子孫下辭明言父祖之罪

虧教傷情莫此爲大且令家人與囚相見無乞鞠之訴使民以明伏罪不須責家人下辭朝議咸以爲允從之世子左衛率謝靈運輒殺人御史中丞王淮之坐不糾免官武帝以廓剛直不容邪枉補御史中丞所糾奏百僚震肅時中書令傅亮任寄隆重學冠當時朝廷儀典皆取定於亮每咨廓然後施行亮意若有不同廓終不爲屈時疑楊州刺史廬陵王義真朝堂班次亮與廓書曰楊州自應著刺史服耳然坐起班次應在朝堂諸官上不應依官次里下足下試更尋之詩序云王姬下嫁於諸侯衣服禮秩不係其夫下王后一等推王姬下王后一等則皇子居然在王公之上陸士衡起居注式乾殿集諸皇子悉在三司上今抄疏如別又海西即位赦文太子武陵王第一撫軍將軍會稽王第二大司馬第三大司馬位既最高又督都中外而次在二王之下豈非下皇子耶此文今俱在也永和中蔡公爲司徒司馬簡文爲撫軍開府對祿朝政蔡爲正司不應反在儀同之下而于時位次相王在前蔡公次之耳諸例甚多不能復具疏楊州反乃居卿君之下恐此失禮宜改之耶廓答曰楊州位

居卿君之下常亦惟疑然朝廷以位相次不以本封復無明文云皇子加殊禮齊獻王爲驃騎孫秀來降武帝欲優異之以爲驃騎轉齊王鎮軍在驃騎上若如足下言皇子使在公右則齊王本次自尊何改鎮軍令在驃騎上明知故依見位爲次也又齊王爲司空賈充爲太尉俱錄尙書署事常在充後潘正叔奏公羊事于時三錄梁王彤爲衛將軍署太尉隴西王泰司徒王玄冲下近太元初賀新宮成司馬太傅爲中軍而以齊王柔之爲賀首立安帝爲太子止禮徐邈爲郎位次亦以太傅在諸王下又謁李太后宗正尙書符令以高密王爲首時王亭爲僕射王徐皆是近世識古今者足下引式乾公王吾謂未可爲據其上出式乾古傳中彭城王植荀組潘岳稽紹杜斌然後道下所疏四王在三司之上反在黃門郎下有何義在四王之下則云大將軍梁王彤車騎趙王倫然後云司徒王戎耳梁趙二王亦是皇子屬尊位齊在豫章王常侍之下又復不通蓋書家指疏時事不必存其班次式乾亦是私宴異於朝堂如今含章西堂足下在僕射下又云曾祖與簡文對錄位在簡文下吾家故事

則不然今寫如別王姬身無爵位固可不從夫而以王女爲尊皇子出任則有位有位則依朝復示之班序惟引奏和赦文則差可爲言然赦文前後亦參差不同太宰上公自在大司馬前耳簡文雖撫軍時已授丞相殊禮又中外督都故以任爲班不以都中外便在公右也今護軍總方伯而位次故在持節都督下足下復思之遷司徒左長史出豫章太守徵爲吏部尙書廓因北地傳隆問亮選事若悉以見付不論不然不能拜也亮以語錄尙書徐羨之曰黃門郎以下悉以委蔡吾徒不必厝懷自此以上故宜共參異同廓曰我不能爲徐干木署紙尾也遂不拜干木羨之小字也選按黃紙錄尙書與吏部尙書連名故廓云署紙尾也羨之亦以廓正直不欲使居權要徙爲祠部尙書文帝入奉大統尙書令傅亮率百僚奉迎廓亦俱行至尋陽遇疾不堪前亮將進路詣廓別廓謂曰營陽在吳宜厚加供奉營陽不幸卿諸人有弑主之名欲立於世將可得邪亮已與羨之議害少帝乃馳信止之信至已不及羨之大怒曰與人共計議云何裁轉背便賣惡於人及文帝即位謝晦將之荊州

與廓別屏人問曰吾其免乎廓曰卿受先帝顧命任以社稷廢昏立明義無不可但殺人二昆而以北面挾震主之威據上疏之重以古推今自免爲難也廓年位並輕而爲時流所推重每至歲時皆束帶列門奉兄軌如父家事小大皆諮而後行公祿賞賜一皆入軌有所資須悉就典者請焉從武帝在彭城妻鄒氏書求夏服廓答曰知須夏服給事自應相供無容別寄時軌爲給事中元嘉二年廓卒時年四十七歲武帝嘗云羊徽蔡廓可平世三公少子興宗

宋書

蔡興宗濟陽考城人年十歲失父哀毀有異凡童廓罷豫章郡還起二宅先成東宅與軌廓亡而館宇未立軌罷長沙郡還送錢五十萬以補宅直興宗年十歲白母曰一家由來豐儉必共今日宅價不宜受也母悅而歸焉軌有愧色謂其子淡曰我年六十行事不及十歲小兒尋喪母少好學以業尙素立見稱初爲彭城王義康司從行參軍太子舍人南平穆王冠軍武昌太守又爲太子洗馬義陽王友中書侍郎中書令建平王宏侍中王僧綽並與興宗厚善元凶弒立僧綽被誅凶威方盛親

故莫敢往興宗獨臨哭盡哀出爲司空何尙之長史又遷太子中庶子明帝踐祚還先職遷臨海太守徵爲黃門郎太子中庶子轉游擊將軍俄遷尙書部郎時尙書何偃疾患上爲興宗曰卿詳練清濁今以選事相付便可開門當之無所讓也轉司徒左長史復爲中庶子領前軍將軍遷侍中每正言得失無所顧憚由是失旨竟陵王誕據廣陵城爲逆事興宗奉旨慰勞州別駕范義與興宗素善在城內同誅興宗至廣陵躬自收殯致喪還豫章舊墓上聞之甚不悅廬陵內史周朗以正言得罪鑕付寧州親戚故人無敢贈送興宗在直請急詣朗別上知尤怒坐屬疾多日白衣領職尋左還司空沈慶之長史行兖州事還爲廷尉鄉有解士先者告申坦昔與丞相義宣同謀時坦已死子令孫時作山陽郡自繫延尉興宗議曰若坦昔爲戎首身今尙存累經肆眚猶應蒙宥令孫天屬理相爲隱况人亡事遠追相誣訐斷以禮律義不合關若工先審知逆謀當時即應啓聞包藏積年發因私怨况稱風聲路傳實無主而干續欺罔罪合極法又有訟民嚴道思等二十二人事未洗正敷以當訊權繫尙

方興宗以訟民本在求理故不加械即若繫尙方於事爲苦又司徒前劾送武康令謝沈及郡主尉還職司十一人坐仲良鑄錢不禽久已判結又送郡主簿丘元敬等九人或下疾假或去職已久又加執啟事悉見從出爲東陽太守遷安陸王子綏後軍長史江夏內史行郢州事徵還未拜留爲左民尙書頃之轉掌吏部時上方盛淫宴虐侮羣臣自江夏王義恭以下咸加穢辱唯興宗以方直見憚不被侵媿尙書僕射顏師伯謂議曹郎王軌之曰蔡尙書常免昵戲去人實遠軌之曰蔡豫章昔在相府亦以方嚴不狎武帝宴私之曰未嘗相召每至官賭常在勝朋蔡尙書今日可謂能負荷矣大明末前廢帝即位興宗告太宰江夏王義恭應須策文義恭曰建立儲副本爲今日復安用此興宗曰累朝故事莫不皆然近永初之末營陽王即位亦有文策今在尙書可檢視也不從興宗時親奉璽綬嗣主容色自若了無哀貌興宗出謂親故曰魯昭在戚而有嘉容終之以釁結大臣昭子請死國家之禍其在此乎時義恭錄尙書事受遺輔政阿衡幼主而引身避事政歸近習越騎校尉戴法興中書

舍人巢尚之專制朝權威行近遠興宗職管九流銓衡所寄每至上朝輒與令錄之下陳欲登賢進士之意又箴規得失博論朝政義恭素性恇撓阿順法興常慮失旨聞興宗言輒戰懼無計先是大明世奢侈無度多所造立賦調煩嚴徵役過苦至發詔悉皆削除由此紫極殿南北馳道之屬皆被毀壞自孝建以來至大明末凡諸制度無或存者興宗於都坐慨然謂顏師伯曰先帝雖非盛德主要以道始終三年無改古典所貴今殯宮始徹山陵未遠而凡諸制度興造不論是非一皆刊削雖復禪代亦不至爾天下有識當以此窺人師伯不能用興宗每陳選事法興尚之等輒點定回換僅有在者興宗於朝堂謂義恭及師伯曰主上諒闇不親萬機而選舉密事多被刪改復非公筆亦不知是何天子意王景文謝章等遷授失序興宗又欲美選時薛安都爲散騎常侍征虜將軍太子左率殷常爲中庶子興宗先選安都爲左衛將軍常侍如故殷常爲黃門領校太宰嫌安都爲多欲單爲左衛興宗曰率衛相去唯阿之間且已失征虜非乃超越復奪常侍頓爲降貶若謂安都晚達微人本宜裁

抑令名器不輕宜貫序謹以選體非私安都義恭官宜加超授者殷常便應侍中那得爲貴而已興宗又曰中庶侍中相去實遠且安都作率十年殷常中庶百曰今又領校不爲少也使選令史顏緯之薛慶先等往復論執義恭然後署案既中旨以安都爲右衛加給事中由是大忤義恭及法興等出興宗吳郡太守固辭郡執政愈怒又轉爲新安王子鸞撫軍司馬輔國將軍南東海太守行南徐州事又不拜苦求益州義恭於是大怒上表曰臣聞慎節言語大易有規銓序九流無取裁闕若乃結黨連羣譏訴互起街談巷議罔顧聽聞乃撤實憲制所宜禁經之巨蠹侍中祕書監臣或自表父疾必求侍養聖旨矜體特順所陳改臣授府元僚兼帶軍郡雖臣駑劣府任非輕准之前人不爲屈後京都本以爲錄不計戶之少多遇缺便用無關高下撫軍長史莊滯府累朝每陳危苦內職外府稱未堪依唯王球昔比賜以優養恩慈之厚不近於簿前新除吳郡太守興宗前居選曹多不平允鴻渥含宥恕其不閑改任大都寵均阿輔仍苦請益州雅達成命伏尋楊州刺史子尙吳興太守休若並國之

茂戚魯衛攸在猶牧守東山竭誠撫莅而辭擇適惰起自庶族連佐北蕃尤無欣荷御史中丞永昔歲餘愆從恩今授光祿勳臣淹雖曰代臣累經降黜後效未申以何取進司徒左長史孔覲前降右衛尋徙今職回換之宜不爲乃少竊外談謂或等咸爲失分又聞興宗躬自怨對與尙書右僕射師伯疏疏旨甚苦臣雖不見所聞不虛臣以凡才不應機務謬自幸會受任三朝進無古人舉賢之美退無在下獻替之績致茲紛紜伏增慙悚然此源不塞此風弗變將虧正道塵穢盛猷伏願聖聽賜垂覽察詔曰太宰表如此省以憮然朕恭承洪緒思弘盛烈而在朝凌競驅扇成風將何以式揚先德克隆至化公體國情深鰲保攸託便可付外詳議義恭因使尙書令柳元景奏曰臣義恭表詔書如右攝曹辨覈尙書袁愍孫牒此月十七日詣僕射顏師伯語次因及尙書蔡興宗有書固辭今授仍出疏見公乃者數紙不意悉何何所道緣此因及朝士當今聖世不可使人以爲少今牒之數朝廷處之實得所臣等亦自謂得分常多在門袁愍孫無或措多而愚意欲啟更量出內之宜芻蕘管見願在聞

徹選令史宜傳密事故因附上聞亦外人言此今辭慶先列今月十八日往尙書袁
愍孫論選事愍孫云昨詣顏僕射出蔡尙書疏見示言辭甚苦又云所得亦少主上
踐祚始爾朝士有此人不多物議謂應美用乃更恨少使咨事便啓錄公又謝莊闕
時未老其疾以轉差今居此任復爲非宜謂宜中書令才望爲允又孔覲南士之美
所歷已多近頻授即復回改於理爲屈門下無人此是名選又張求地可論其去歲
愆戾非爲深罪指望復門下一人張淹替忝南下預因休戚雖屢經愆黜事亦已久
謂應秘書監帶授興宗手跡數紙文翰炳然事明白不假敷辨愍孫任居官人職掌
銓裁若有未久則宜顯言而私加許與自相選署託云物論終成虛詭隱末出端還
爲矛盾臣聞九官成讓虞風垂則誹主怨時漢罪夙斷况義爲身發言謗朝序亂辟
害政混穢大猷紛紜彰謬上延詔旨不有霜准軌憲斯淪請解興宗新附官須事御
收付廷尉法獄治罪免愍孫所居官詔曰興宗首亂朝典允當明憲以其昔經近侍
未忍盡法可令思愆遠封愍孫竊評自己委咎物議可以子領職除興宗新昌太守

郡屬交州朝廷莫不嗟駭先是興宗納何后寺尼智妃爲妾姿貌甚美有名京師迎車已去而師伯密遣人誘之潛往載取興宗迎人不覺及興宗被徙論者並云由師伯師伯甚病之法興等既不欲以徙大臣爲名師伯又欲止息物議由此停行頃之法興見殺尙之被繫義恭師伯誅復起興宗爲臨海王子項前車長史輔國將軍南郡太守行荊州事不行時前廢帝凶暴興宗外甥袁顥爲雍州刺史勸興宗行曰朝廷形勢人所共見在內大臣朝夕難保舅今出居陝西爲八州事顥在襄河地勝兵強去江陵咫尺水陸通便若朝廷有事可共立桓文功豈與受制凶狂禍難不測同年而語乎今不去虎口而守此危逼後求復出豈得哉興宗曰吾素門平造與主上甚疎未容有患宮省內外人不自保會應變若內難得弭外釁未必可量汝欲在外求全我欲居內免禍各行所見不亦善乎時京城危懼衣冠咸欲遠徙後皆流離外難百不一存重除吏部尙書太尉沈慶之深慮危禍閉門不通賓客嘗遣左右范羨詣興宗屬事興宗謂羨曰公開門絕客以避悠悠請託耳身非有求何爲見拒還造

慶之慶之遣羨報命要興宗令往興宗因說之曰先帝雖無功於天下要能定平凶逆在位十一年以道晏駕主上紹臨四海清謐即位正是舉止違衷小小得失耳亦謂春秋尙書進德可期而比者所行人倫盡今所忌憚唯在於公百姓喁喁無假息之望所冀正在公一人而已若復坐視成敗者非唯身禍不測四海重責將有所歸公威名素著天下所服今舉朝遑遑人人危怖指麾之日誰不景從如其不斷旦暮禍及僕昔佐貴府蒙眷異常故敢盡言願公思爲其計慶之曰僕皆前慮不復自保但盡忠奉國始終以之正當委天任命耳加老罷私門兵力頓闕雖有其意事亦無從興宗曰當今懷謀思奮奮者非要富貴求功賞各欲免死朝夕耳殿內將帥正聽外間消息若一人唱首則俯仰可定况公威風先著統戎累朝諸舊部曲布在宮省宋越譚金之徒出公宇下並受生成攸之恩仁公家口子弟耳誰敢不從且公門徒義附並三吳勇士宅內奴童人有數百陸攸之今入東討賊又大送鎧仗在青溪未發攸之公之鄉人驍勇有膽力取其器仗以配衣宇下使攸之率以前驅天下事定

矣僕在尙書中自當率百僚案前世故事更簡賢明以奉社稷昔太甲罪不加民昌邑虐不及下伊尹霍光猶成大事况今蒼生窘急禍百往代乎又朝諸所行造民間皆云公悉豫之今若沈疑不決當有先公起事者公亦不免附從之禍車駕屢幸貴第醉酣彌留又聞屏左右獨入閣內此萬世一時機不可失僕荷養深重故吐去梯之言宜詳其禍福慶之曰深感君無已意此事大非僕所能行事至故當抱忠以沒耳頃之慶之果以見忌致禍時領軍王玄謨大將有威名邑里訛言云已見誅市道宣擾玄謨典籤包法榮者家在東陽興宗故郡民也爲玄謨所信見使至興宗因謂曰領軍殊當憂懼法榮曰領軍此日殆不復食夜亦不眠常言收已在門不保俄頃興宗曰領軍憂懼當爲方畧那得坐侍禍至初玄謨舊部曲猶有三千人廢帝頗疑之徹配監者玄謀大息深怨啓五百人巖山營墓事猶未畢少帝欲獵又息喚還城巖兵在中堂興宗勸以衆舉事曰當令以領軍威名率此爲朝廷唱始事便立尅領軍雖復失脚自可乘輿處分禍殆不測勿失事機君還可白領軍如此玄謨遺法榮

報曰此亦未易可行期當不泄君言明帝踐祚玄謨責所親故吏郭季產女塔韋希真等曰當艱難時周旋輩無一言相扣發者季產曰蔡尙書令包法榮所道非不會機但大事難人有季產言亦何益玄謨有慙色右衛將軍劉道隆爲帝所寵信專統禁兵乘輿嘗夜幸著作佐郎江敷宅興宗馬車從道隆車後過興宗謂曰劉公比曰思一閑寫道隆深達此旨招興宗手曰蔡公勿多言帝每因朝宴捶歐羣臣自驃騎大將軍建安王休仁以下侍中袁愨孫等咸見陵曳唯興宗得免頃之明帝定大事是廢帝橫尸在大醫閣口興宗謂尙書右僕射王景文曰此雖凶悖要是天下之主宜使喪禮粗足若直如此四海必將乘人時諸方並舉兵又國家所保唯丹陽淮南數郡其間諸縣或已應賊東兵已至永世宮省危憂懼上集羣臣以謀成敗興宗曰今普天圖逆人有異志宜鎮以靜以至信待人比者逆徒親戚布在宮省若繩之以法則土崩立至宜明罪不相及之義物情既定人有戰心六軍精勇器甲犀利以待不習之兵其勢相萬耳願陛下勿憂上從之加游擊將軍未拜遷尙書右僕射尋領

衛尉又領衮州大中明帝謂興宗曰諸處未定殷琰已復同逆頃曰人情云何事當濟不興宗曰逆之與順臣無以辨今商旅斷絕而米甚豐賤四方雲合而人情更安以此卜之清蕩可必但臣之所憂更在事後猶羊公言既平之後方當勞聖慮耳尙書褚淵以手板築興宗興宗言之不已上曰如卿言楮圻平函送袁顛首勅從登高掖門樓觀之興宗潛然流涕上不悅事平封興宗始昌縣伯食邑五百戶固讓不許封樂安縣伯邑三百戶國秩吏力終以不受時殷琰嬰據壽陽爲逆遣輔國將軍劉劬攻圍四方旣平琰嬰城固守上使中書爲詔譬琰興宗曰天下旣定是琰思過之日金下宜賜手詔數行以相私慰今直中書爲詔彼必疑謂非眞未是所以速清方難也不從琰得詔謂劉劬詐造果不敢降攻戰經時人乃歸順先徐州刺史薛瑩都據彭城反後遣使歸順此城不虛今以撫之以和即安所位乃遣須單使及咫尺書耳若以重兵迎之勢必疑懼或能招引北虜爲患不測叛臣釁重必宜翦戮則比者所宥亦已弘矣况安都外據疆地密邇邊關考之國計尤宜馴養如其遂叛將生吁

食之憂彭城嶮固兵強將勇圍之既難攻不可拔疆塞之虞二三宜慮臣爲朝廷憂之時張永已行不見從安都聞大軍過淮嬰城自守要取索虜永戰大敗又值寒雪死者十八九遂失淮北四州其先見如此初永敗聞至上在乾明欲先召司徒建安王休仁又召興宗謂休仁曰吾慙蔡僕射以敗書示興宗曰我愧卿三年春出爲使持節都督郢州諸軍事安西將軍郢州刺史坐詣尙書功論如何始真爲咨議參軍初不被許後又重陳上怒貶號平西將軍尋又復號初吳興丘珍孫論常侵興宗珍孫子景先人才甚美興宗與之周旋及景先爲鄱陽郡值晉安王子勛爲逆轉在竟陵爲吳喜所殺母老女穉流離下口興宗至郢州親自臨哭致其喪柩家累令得還在任三年遷鎮東將軍會稽太守加散騎常侍尋領兵置佐加都督會稽東陽新安永嘉臨海五郡諸事給鼓吹一部會稽多諸豪右不遵王憲又幸臣近習參半宮省封畧山湖妨民害治興宗皆以法繩之會土全實民物殷阜王公妃主邸舍相望橈亂在所大爲民患子息滋長督貴無窮興宗悉啓罷省又陳原諸逋負解遣雜役見

從三吳舊有鄉射禮久不復修興宗行之禮儀甚整先是元嘉中羊玄保爲郡亦行鄉射明帝崩興宗與尙書令袁粲右僕射褚淵中領軍劉劭鎮軍將軍沈攸之同被顧命以興宗爲使持節都督荆湘譙益梁寧南北秦八州諸軍事征西將軍開府儀同三司荊州刺史加班劍二十人常侍如故被徵還都時右軍將軍王道隆任參內政權重一時躡履到前不敢就席良久方去竟不呼坐元嘉初中書舍人狄當詣太子詹事王曇首不敢坐其後中書舍人王弘爲文帝所愛遇上謂曰卿欲作士人得就王球坐乃當判耳殷劉並雜無所知也若往詣球可稱旨就席球舉扇曰若不得爾弘還依事啓聞帝曰我便無如此何五十年中有此三事道隆等以興宗疆正不欲使擁兵上流改爲中書監左光祿大夫開府儀同三司常侍如故固辭不拜興宗幼立風概家行尤謹奉宗姑事寡嫂養孤兒子有聞於世太子左率王錫妻范聰明婦人也有才藻學見與錫弟僧達書誥讓之曰昔謝太傅奉嫂王夫人如慈母今蔡興宗亦有共和之稱其爲世所重如此妻劉氏早卒一女甚幼外甥袁顛始生彖而

妻劉氏亦亡興宗姊即顓母也一孫一侄躬自撫養年齒相比欲爲婚姻每見興宗輒言此意大明初詔興宗女與南平王敬猷婚興宗以姊生平之懷屢經陳啓答曰卿諸人欲各行己意則國家何由得婚且姊言豈是不可違之處邪舊意既乖彖亦他娶其後彖家好不終顓又禍敗彖等淪廢當時孤微理盡敬猷遇害興宗女無子嫠居名門高胄多欲結姻明帝亦勅適謝氏興宗並不許以女適彖北地傅隆與廓相善興宗修父友敬秦豫元年薨時年五十八遺令薄葬奏還封爵追贈後授子景玄固辭不受又奏還封表疏十餘上見許詔曰景玄表如此故散騎常侍中書監左光祿大夫開府儀同三樂安縣開國伯興宗忠恪立朝謀猷宣著往屬時難勳亮帷幄錫珪分壤實允通誥而懇誠慊訴備彰存沒廉概素情有絜聲軌景玄固陳先志良以惻然雖彝典宜全而哀歎難奪可特申不瞑之請永袷克讓之風初興宗爲郢州府參軍彭城顏敬以式卜曰亥年當作公官有大字者不可受也及有開府之授而太歲在亥果薨於光祿大夫之號焉文集傳於世景玄雅有父風爲中書郎晉陵

太守太尉從事中郎昇明末卒

宋書

江夷字茂遠濟陽考城人祖晉護軍將軍父顓驃騎諮議參軍夷少藻厲爲後進之美宋武帝拔爲鎮軍行參軍預討桓玄事累遷大司馬右僕射夷美丰儀善舉止歷任以和簡稱卒遺令簿歛蔬奠務存儉約子湛

南史

江湛字徽深考城人父夷江州刺史居喪以孝聞愛文藝善彈棋鼓琴兼明算術爲彭城王義康司徒主簿太子中舍人司徒檀道濟爲子求娶湛妹不許義康有命又不從時人重其立志義康之盛人競求昵惟湛自疏固求外出乃以爲武陵內史隨王誕爲北中郎將南徐州刺史以湛爲長史東海太守委以政事元嘉二十五年徵爲侍中任以機密遷左衛將軍時改選舉職以湛領博士轉吏部尙書家甚貧不營財利餉饋盈門一無所受無兼衣餘食嘗爲上所召遇澣衣稱疾經日衣成然後起牛餓御人求草湛良久曰可與飲在選職頗有刻覈之機而公平無私不受請謁論者以此稱焉初上大舉北侵舉朝謂爲不可惟湛贊成之及魏太武至瓜步以湛兼

領尚書事處分一以委焉魏遣使求婚上召太子劭以下集議衆並謂宜許湛謂許之無益劭怒謂湛曰今三王在阨詎宜苟執異議聲色甚厲坐散俱出劭使班劍及左右推排之始於傾倒劭使湛具詔草劭入殺湛直上省聞叫乃匿傍小屋劭遣求之舍吏給云不在此兵卽殺舍吏乃得見湛湛據窗受害意色不撓五子恚怒慙慙法壽皆見殺初湛家數見怪異未敗少日所眠牀忽有數斗血孝武即位追贈在光祿大夫開府儀同三司諡曰忠簡公恚位著作佐郎子敷

南史

齊

江敷字叔文考城人宋文帝女淮陽長公主幼以戚屬召見孝武謂謝莊曰此小兒方當爲名器少有美譽尚孝武女臨汝公主拜駙馬都尉爲丹陽丞時袁粲爲尹見敷歎曰風流不墜政在江郎敷與宴賞流連日夜遷中書郎敷庶祖母王氏老疾敷視膳嘗藥七十餘日不解衣及累居內宮每以侍養陳情請朝廷優其朝直初敷娶褚秀之女大義不終褚顏回爲衛軍重敷爲人先通意引爲長史領臨淮太守轉齊

高帝大尉從事中郎將復爲吏部郎高帝即位數以祖母久疾啓求自解初宋明帝勅數出繼其叔慈爲從祖淳後於是僕射王儉啓禮無後小宗之文近代緣情皆由祖父之命未有既孤之後出繼宗族也雖復臣子一揆而義非天屬江忠簡胤嗣所寄唯數一人傍無碁屬數以還本若不欲江慈絕後可以數小兒繼慈爲孫尙書參議謂間世立後禮無其文荀顛無子立孫墜禮之始何琦又立此論義無所據於是數還本家詔使自量立後者出爲豫章內史還除太子中庶子未拜門客通贓利武帝遣使檢覆數藏此客而躬自引咎上甚有怪色王儉從容啓上曰江數若能臨郡此便是具美耳上意乃釋永明中爲竟陵王司馬數好文辭圍棋第五品爲朝貴中最遷侍中歷五兵尙書東洋吳二郡太守復爲侍中轉都官尙書領饒騎將軍王晏啓武帝曰江數今重登臺閣兼掌六軍慈渥所覃實有優忝但語其事任殆同閑輩天旨旣欲升其名位愚以爲侍中領驍騎望實清顯有殊納言上曰數常啓吾爲其鼻中惡今旣以何胤王瑩還門下故有此回換耳先是中書舍人紀僧真幸於武帝

稍歷軍校容表有士風謂帝曰臣小人出自本縣武吏邀逢聖時階榮至此爲兒婚得苟昭光女即時無復所須唯就陛下乞作士大夫帝曰由江敷謝淪我不得措此意可自詣之僧真承旨詣敷登榻坐定敷使命左右曰移吾牀讓客僧真喪氣而退武帝曰士大夫固非天子所命時人重敷風格不爲權幸降意隆昌元年爲侍中領國子祭酒鬱林廢立託散動醉吐車中而去明帝即位改領秘書監又改爲晋安王師卒遺令不受賻贈詔賻錢三萬布百疋子雋啟遵敷命不受詔嘉美之從其所請僧散騎常侍太常卿謚曰敬子子雋

南齊書

蔡約字景撫濟陽考城人祖廓宋祠部尙書父興宗征西儀同約少尙宋孝武女安吉公主拜駙馬都尉秘書郎不拜順帝徵爲車騎驃騎行參軍通直郎不就遷齊高帝司空東閣祭酒太尉主簿高帝即位爲世子中舍人仍隨度東宮轉鄱陽王友竟陵王鎮北征北諮議領記室中書郎司徒右長史黃門郎領本州中正出爲新安太守復爲黃門郎領射聲校尉通直常侍領驍騎將軍太子中庶子領屯騎校尉永明

八年八月合朔約脫武冠解劔於省眠至下鼓不起爲有司所奏贖論鬱林王立鎮校尉如故出爲宜都王冠軍長史淮南太守行府州事武帝謂約曰今用卿爲近蕃上佐想副我所期約曰南豫密邇京師不治自理臣亦何人燭火不息時諸王行事多相裁制約在任主佐之間穆如也遷司徒左長史明帝爲錄尙書輔政百僚履履到席約躡裘不改帝謂江祐曰蔡氏是禮度之門故自可悅祐曰大將軍有掛客復廬陵王右軍長史將軍如故轉都官尙書遷邵陵王師加給事中江夏王車騎長史加征虜將軍竝不拜好飲酒夷淡不與世雜遷太子詹事永明二年卒四十四太常

南齊書

梁

蔡樽字景節濟陽考城人父興宗宋左光祿大夫開府儀同三司有重名前代樽少方雅退默與兄寅俱知名選補國子生舉高第爲司徒法曹行參軍齊左衛將軍王儉高選府僚以樽爲主簿累遷建安王文學司徒主簿左西屬明帝爲鎮軍將軍引

爲從事中郎遷中書侍郎中軍長史給事黃門侍郎丁母憂廬於墓側齊宋多難服闋因居墓所除太子中庶子太尉長史竝不就梁武帝輔政爲侍中遷臨海太守坐公事左遷太子中庶子復爲侍中吳興太守天監元年宣城郡吏吳丞伯挾祆道聚衆攻宣城殺太守朱僧勇因轉屠旁縣踰山寇吳興所過皆殘破衆有二萬奄襲郡城東道不習兵革吏民懼擾奔散竝請樽堅守不動募勇敢固郡丞伯盡銳攻樽命衆出拒戰於門應手摧破臨陣斬丞伯餘黨悉平加信武將軍徵度支尙書遷中書令復爲信武將軍晉陵太守還除通直散騎常侍國子祭酒遷吏部尙書居選弘簡有名稱又爲侍中領秘書監轉中書令侍中如故普三年出爲宣毅將軍吳郡太守四年卒時年五十七追贈侍中金紫光祿大夫宣惠將軍諡曰康女爲昭明太子妃子彥深宣城內史彥高給事黃門侍郎彥高子凝

凝書

江淹字文通濟陽考城人少孤貧好學沉靜少交遊起家南徐州從事轉奉朝請宋建平王景素好士淹隨景素在南齊州廣陵令郭彥文得罪辭連淹繫州獄淹獄中

上書曰昔者賤臣叩心飛霜擊於燕地庶女告天振風襲於齊臺下官每讀其書未嘗不廢卷流涕何者士有一定之論苟有不易之行信而見疑貞而爲戮是以壯失義士伏死而不顧者此也下官聞仁不可恃士不可依始爲徒語乃今知之伏願大王靈停左右少加憐鑒下官本蓬戶桑樞之民布衣韋帶之士退不飾詩書以驚愚進不買名聲於天下日者謬得升降承明之闕出入金華之殿何嘗不局影凝嚴側身局禁者乎竊慕大王之義爲門下之賓備鳴盜淺術之餘豫三五賤伎之未大王惠以恩光駉以顏色實佩荊卿黃金之賜竊感豫讓國士之分矣常欲結纓伏劍少謝萬一剖心摩踵以報所天不圖小人固陋坐貽謗缺迹墜昭憲身限幽圉履影弔心酸鼻痛骨下官聞虧名爲辱虧形次之每一念來忽若有遺加以涉旬月迫季秋天光沉陰左右無色身非木石與獄吏爲伍此少卿所以仰天搥心泣盡而繼之以血者也下官雖乏鄉曲之譽然嘗聞君子之行矣其上則隱於廉肆之間臥於巖石之下次則結綬金馬之庭高議雲臺之上次則虜南越之君係單于之頸俱啓丹冊

並圖青史寧當爭分寸之未競刀筆之利哉然下官聞積毀銷金積讒糜骨古則直
生取疑於盜金近則伯魯被名於不義彼之二才猶或如此况在下官尙何言哉夫
連之智密祿而不反接輿之賢行歌而忘歸子陵閉關於東越仲蔚杜門於西秦
亦良可知也若使下官事非其虛罪得其實亦當鉗口吞舌伏匕首以殞身何以見
齊魯奇節之人燕趙悲歌之士乎方今聖歷欽明天下樂業青雲浮雜榮光塞河西
洎臨狹道北距飛狐陽原莫不浸仁沐義昭景飲醴而下官抱痛園門含憤獄一戶
物之微有足悲者仰惟大王少垂明白則梧丘之魏不愧於沉首鵠亭之鬼無限於
灰骨不任膽之切敬因執事以聞此心既照死且不朽景素覽書卽日去之尋舉南
徐州秀才對册上第轉巴陵王國左常侍景素爲荊州淹從之鎮少帝卽位多失德
景素專據上流咸勸因此舉事淹每從容諫曰流言納禍二叔所以同亡抵局商怨
七國於焉俱斃殿下不求宗廟之安而信左右之計則復見麋鹿霜露棲於姑蘇之
臺矣景素不納及鎮京口淹又爲鎮軍參軍事領南東海太守陸澄丁艱淹自謂郡

丞應行郡事景素用司馬柳世隆淹固求之景素大怒言於選部黜爲建安吳興令淹在縣三年昇明初齊武帝輔政聞其才召爲尙書駕部郎驃騎參軍事俄而荊州刺史沈攸之作亂武高謂淹曰天下紛紛若是君謂何如淹對曰昔項疆而劉弱袁衆而曹寡羽號令諸侯卒受一劍之辱紹跨躡四州終爲奔北之虜此謂在德不在鼎公何疑哉帝曰聞此言者多矣試爲虜之淹曰公雄武有奇畧一勝也寬容而仁恕二勝也賢能畢力三勝也民望所歸四勝也奉天子而伐叛逆五勝也彼志銳而器小一敗也有威而無恩二敗也士卒解體三敗也搢紳不懷四敗也懸兵數千里而同惡相濟五敗也故雖豺狼十萬而終爲我獲焉帝笑曰君談過矣是時軍書表記皆使淹具草相圖建補記室參軍事建元初又爲驃騎建安王記室帶東武令參掌冊昭并典國史尋遷中書侍郎永明初遷驃騎將軍掌國史出爲建武將軍廬陵內史視事三年還爲驍騎將軍兼尙書左丞尋復以本官領國子博士少帝初以本官兼御史中丞時明帝作相因謂淹曰君昔在尙書中非公事不妄行在官寬猛能

拆衷今爲南司足以震肅百寮淹答曰今日之事可謂當官而行更恐才劣志簿不足
以仰稱明旨耳於是彈中書令謝朓司徒左長史王績護軍長史庾弘遠並以久
疾不預山陵公事又奏前益刺史劉俊梁州刺史陰智伯並贓貨巨萬輒收付廷尉
治罪臨海太守沈昭略永嘉太守庾曇隆及諸郡二千石并大縣官長多被劾治內
外肅然明帝謂淹曰宋世以來不復有嚴明中丞君今日可謂近世獨步明帝即位
爲車騎臨海王長史俄除廷尉卿加給事中遷冠軍長史加輔國將軍出爲室城太
守將軍如故在郡四年還爲黃門侍郎領步兵校尉尋爲祕書監永元中崔惠景舉
兵圍京城衣冠悉投名刺淹稱疾不往及事平世服其先見東昏末淹以祕書監兼
衛尉固辭不獲免遂親職謂人曰此非吾任路人所知正取吾空名耳且天時人事
尋當飜覆孔子曰有文事者必有武備臨事圖之何憂之有頃之有副領軍王瑩及
梁武帝義師至新林淹微服來奔卽拔爲冠軍將軍祕書監如故尋兼司徒左長史
中興元年遷吏部尙書二年轉相國右長史冠軍將軍如故天監元年爲散騎常侍

左衛將軍封臨沮縣開國伯食邑四百戶淹乃謂子弟曰吾本素宦不求富貴今之
忝竊遂至於此平生言止足之事亦以備矣人生行樂耳須富貴何時吾功名既立
正欲歸身草萊耳其年以疾遷金紫光祿大夫改封醴陵侯四年卒時年六十二武
帝爲素服舉哀賻錢三萬五十匹諡曰憲伯淹少以文章顯晚節才思微退時人皆
謂之才盡凡所著述百餘篇自撰爲前後集并齊史十志並行於世子薦襲封嗣自
丹陽戶丞爲長城令有罪削爵普通四年武帝追念淹功復封爲吳昌伯邑如先梁書
江革字休映濟陽考城人祖齊之宋尚書金部郎父柔之齊尚書倉部郎有孝行以
母憂毀卒革幼而聰敏早有才思六歲便解屬文柔之深加賞器曰此兒必興吾門
九歲丁父艱與弟觀同生孤貧傍無師友兄弟自相訓誨讀書精力不倦十六喪母
以孝聞服闋與觀俱詣太學補國子生舉高第齊中書郎王融吏部謝朓雅相欽重
朓嘗宿衛還過候革時大雪見革弊絮單席而就學不倦嗟歎久之乃脫所著襦并
手割半氊與革充臥具而去司徒竟陵王聞其名引爲西邸學士弱冠舉南徐州秀

才時豫章胡諧之行州事王融與諧之書令薦革諧之方貢瑯琊王汎便以革代之
解褐奉朝請僕射江祐深相引接祐爲太子詹事啓革爲府丞祐時權傾朝右以革
才堪經國令參掌機務詔誥文檄皆委以具革防杜形迹外人不知祐諸賓客皆罹
其罪革獨以智免除尙書駕部郎中中興元年梁武帝入石頭時吳興太守袁昂據
郡拒義師乃使革製書與昂於坐立成辭義典雅武帝深賞歎之因令與徐勉同掌
書記建安王爲雍州刺史表求管記以革爲征北記室參軍帶中廬令與弟觀少長
共居不忍離別苦求同行乃以觀爲征北行參軍兼記室時吳興沈約樂安任昉竝
相賞重昉與革書云此段雍府妙選英才文房之職總卿昆季可謂馭二龍於長途
騁騏驎於千里途次江夏觀遇疾卒革時在雍府王所禮款若布衣王被徵爲丹陽
尹以革爲記室領五官掾除通直散騎常侍建康正頻遷秣陵建康令爲治明肅豪
疆憚之入爲中書舍人尙書左丞司農卿復出爲雲麾晉安王長史尋陽太守行江
州府事徙仁威廬陵王長史太守行事如故以清嚴爲百城所憚時少王行事多傾

意於籤帥革以正直自居不與籤帥等同坐俄遷左光祿大夫南平王長史御史中丞彈奏豪權一無所避除少府卿出爲貞威將軍北中郎南康王長史廣陵太守改受鎮北豫章王長史將軍太守如故時魏徐州刺史元法僧降附革被敕隨府王鎮彭城城既失守革素不便馬乃泛舟而還途經下邳遂爲魏人所執魏徐州刺史元延明聞革才名厚加接待革稱患脚不拜延明將加害焉見革辭色嚴正更相敬重時祖暉同被拘執延明使暉作欵器漏刻銘革罵暉曰卿荷國厚恩已無報答今乃爲虜立銘孤負朝廷延明聞之乃令革作文八寺碑并祭彭祖文革辭以囚執既久無復心思延明逼之逾苦將加筆撲革厲色而言曰江革行年六十不能殺身報主今日得死爲幸誓不爲人執筆延明知不可屈乃止曰給脫粟三升僅餘性命值魏主討中山王元晷反北乃放革及祖暉還朝詔曰前貞威將軍鎮北長史廣陵太守江革才思通瞻出內有聞在朝正色臨危不撓首位台鉉實允僉諧可太尉臨川王長史時武帝盛於佛教朝賢多啓求受戒革精信因果而武帝未知謂革不奉佛教

乃賜革覺意詩五百字云惟當勤精進自疆行勝修豈可作底突如彼不死囚以此告江革并及諸貴遊又手敕云世間果報不可不信豈得底突如對元延明耶革因啓乞受菩薩戒重除少府卿長史校尉時武陵王在東州頗自驕縱上詔革面敕曰武陵王年少臧質性弱不能匡正欲以卿代爲行事非卿不可不得有辭乃除折衝將軍東中郎武陵王長史會稽郡丞行府州事革門生故吏家多在東州聞革應至竝齋持緣道迎候革曰我通不受餉不容獨當故人筐篋至鎮惟資公俸食不兼味郡境殷廣辭訟曰數百革分判辨析曾無疑滯功必賞過必罰民安吏畏百城震恐瑯琊王騫爲山陰令贓貨狼籍望風自解府王憚之遂雅相欽重每至侍宴言論必以詩書王因此耽學好文典籤沈熾文以王所製詩呈武帝帝謂僕射徐勉曰江革果能稱職乃除都官尙書將遷民皆戀惜之贈遺無所受送故依舊訂舫竝不納惟乘臺給一舸舸艚偏歌不得安臥或謂革曰船旣不平濟江甚險當移徙重物以逆輕艚革旣無物乃以西陵岸取石十餘片以實之其清貧如此尋監吳郡于時境內

荒儉刼盜公行革至郡惟有公給仗身二十人百姓皆懼不能靜寇反省遊軍尉民下逾恐革乃廣施恩撫明行制令盜賊靜息民吏安之武陵王出鎮江州乃曰我得江革文華清麗豈能忘之當與其同飽乃表革同行又除明威將軍南中郎長史尋陽太守徵入爲度支尙書好獎進閭閻爲後生延譽由是衣冠士子翕然歸之時尙書令何敬容掌選序用多非其人革性疆直每至朝宴恆有褒貶以此爲權勢所疾乃謝病還家除光祿大夫領步兵校尉南北竟二州大中正優遊閑放以文酒自娛大同元年二月卒諡曰疆子有集二十卷行於世革歷官八府長史四王行事二爲二千石傍無姬侍家徒壁立世以此高之長子行敏好學有才俊官至通直郎早卒有集五卷次子從簡少有文性年十七作採荷詞以刺敬容爲當時所賞歷官司徒從事中郎侯景亂爲任約所害子兼叩頭流血乞代父命以身蔽刃遂具見殺天下莫不痛之

梁書

江倩字彥標濟陽考城人曾祖湛宋左光祿儀同三司父敦齊太常卿竝有重名於

前世舊幼聰警讀書過目便能諷誦選爲國子生通尙書舉高第起家祕書郎累遷司徒東閣祭酒廬陵王主簿居父憂以孝聞廬於墓側明帝敕遣齊使二十人防墓所服闋除太子洗馬累遷司徒左南屬太子中舍人祕書丞出爲建安內史視事某月梁武帝義師下次江州遣寧朔將軍劉護之爲郡督率吏民據郡拒之及建康城平舊坐禁錮俄被原起爲後軍臨川王外兵參軍累遷臨川王友中書侍郎太子家令黃門侍郎領南兖州太中正遷太子中庶子中正如故轉中權始興王長史出爲伏波將軍晉安內史在政清約務在寬惠吏民便之詔徵爲寧朔將軍南康王長史行府州國事頃之遷太尉臨川王長史轉尙書吏部郎左將軍舊方雅有風格僕射徐勉以權重自遇在位者或宿士敬之惟舊及王規與抗禮不爲之屈勉因舊門客翟景爲第七兒絲求舊女婚舊不答景再言之乃杖景四十由此與勉有忤除散騎常侍不拜是時勉又爲子求舊弟葺及王泰女二人並拒之葺爲吏部郎坐杖曹中幹免官泰以疾假出守乃遷散騎長侍皆勉意也初天監六年詔以侍中常侍或侍

帷幄分門下二局入集書其官品視侍中而非華胄所悅故勉斥泰爲之舊尋遷司徒右長史初王泰出閣武帝謂勉云江稽資歷應居選部勉對曰稽有眼患又不悉人物武帝乃止遷光祿大夫大通元年卒時年五十三詔贈本諡蕭稽好學尤悉朝儀故事撰江左遺典三十卷未就卒文集十五卷子孫經在孝行傳

梁書

陳

蔡景歷字茂世濟陽考城人祖點梁尙書左民侍郎父大同輕車岳陽王記室參軍掌京邑行選景歷少俊爽有孝行家貧好學善尺牘工草隸解褐諸王府出爲海陽令爲政有能名侯景亂梁簡文帝爲景所幽景歷與南康嗣王蕭會理謀欲挾簡文帝出奔事泄見執賊黨王偉保護之獲免因客遊京口侯景平陳武帝鎮朱方素聞其名以書要之景歷對使人答書筆不停輟文不重修曰蒙降札書曲垂引逮伏覽循回載深欣暢竊以世求名駿行地能致千里時愛奇寶照車遂有徑寸但雲咸斯奏自輟巴渝杞梓方雕豈盼樛樛仰惟明將軍使君侯節下英才挺茂雄姿秀拔運

屬時艱志匡多難振衡獄而綏五嶺滌贛源而登九派帶甲十萬強弩數千誓勤王之師總義夫之力鯨鯢式剪役不踰時氛霧廓清士無血刃雖漢誅祿產舉朝實賴絳侯晉討約峻中外一資陶牧比事論功彼奚足算加以抗威兗服冠蓋通於北門整旆徐方咏歌溢于東道能使邊亭臥鼓行旅路宿巷不拾遺市無異價洋洋乎功德政化曠古未儔諒非膚淺所能殫述是以天下之人向風慕義接踵披衿雜還而至矣或帝室英賢貴遊令望齊楚秀異荆吳歧嶷武夫則猛氣粉紘雄心四據陸拔山嶽水斷虬龍六鈞之弓左右馳射萬人之劍短兵交接攻壘若文鴛焚艦如黃蓋百戰百勝貔貅爲羣文人則通儒博識英才偉器雕麗暉煥摛綯藻子雲不能抗其筆元瑜無以高其記尺翰馳而聊城下清談奮而羸軍却復有三河辯客改哀樂於須臾六奇謀士斷變反於倏忽治民如子賤踐境有成折獄如仲由片詞從理直言如毛遂能厲主威銜使若相如不辱君命懷抱義感恩狗已誠斷黃金精貫白日海內推賢牢籠斯儒明將軍徹鞍下馬推案止食申爵以榮之築館以安之輕財重

氣卑躬厚士盛矣哉抑又聞之戰國將相咸推引賓遊中代岳牧竝盛延僚友濟濟多士所以成將軍之貴但量能校食稱才任使員行方止各盡其宜受委責成誰不畢力至如走賤妄庸人耳秋冬讀書終慙專學刀筆爲吏竟闕異等衡門衰素無所聞達簿官輕資焉能遠大自陽九邁屯天步艱阻同彼貴仕溺於巨寇亟鄰危殆備踐簿冰今王道中興慙憂啓運獲存微命足爲幸甚方歡飲啄是爲來蘇然皇鑾未反宛洛無曠四壁固三軍之餘長夏無半菽之產遨遊古人聊爲借貸屬此樂土洵美忘歸竊服高義暫謁門下明將軍降以顏色二三士友假其餘論管蒯不棄折簡賜留欲以鷄鶩廁鴛鴻於池沼將移瓦礫參金碧之聲價昔折脅遊秦忽逢盼採擔簦入趙便致留連今雖羈旅方之非匹樊林之賁何用克堪但眇眇纖蘿憑喬松以自聳蠢蠢輕蚋託驂尾而遠鶩竊不自涯願備下走且爲復背之毛脫充鳴吠之數增改觀爲幸已多海不厭深山不厭高敢布心腹惟將軍覽焉武帝得書甚加欽賞仍更賜書報答卽日板征北府中記室參軍仍領記室衡陽獻王時爲吳興郡昌年

尙少吳興王之鄉里父老故人尊卑有數武帝恐昌年少接對乖禮乃遣景歷輔之承聖中授通直散騎侍郎還掌府記室武帝將討王僧辯獨與侯安都等數人謀之景歷弗之知也部分既畢召命草檄景歷援筆立成辭義感激事皆稱旨僧辯誅武帝輔政除從事中郎掌記室如故紹泰元年遷給事黃門郎侍兼掌府記室武帝受禪選祕書監中書通事舍人掌詔誥永定二年坐妻弟劉淹詐受周寶安餉馬爲御史中丞沈炯所劾降爲中書侍郎舍人如故三年武帝崩時外有疆寇文帝鎮于南皖朝無重臣宣后呼景歷及江大權杜稜定議乃祕不發喪疾召文帝景歷躬共宦者及內人密營歛服時既暑熱須治梓宮恐斤斧之聲或聞於外仍以獵爲祕器文書詔誥依舊宣行文帝卽位復爲祕書監舍人如故以定策功封新豐縣子邑四百戶累遷散常騎侍世祖誅侯安都景歷勸成其事天嘉三年以功遷太子左衛率進爵爲侯增邑百戶常侍舍人如故六年坐妻兄劉洽依倚景歷權勢前後姦訛并受歐陽武威餉絹百匹免官廢帝卽位起爲鎮東鄱陽王諮議參軍兼太府卿華皎反

以景歷爲武勝將軍吳明徹軍司皎平明徹於軍中輒戮安成內史楊文通又受降人馬仗有不明景歷又坐不能匡正被收付治久之獲宥起爲鎮東鄱陽王諮議參軍宣帝卽位遷宣惠豫章王長史帶會稽郡守行東楊州府事秩滿遷戎昭將軍宣義長沙王長史尋陽太守行江州府事以疾辭遂不行入爲通直散騎常侍中書通事舍人掌詔誥仍復封邑遷太子左衛率常侍舍人如故太建五年都督吳明徹北伐所向克捷與周將梁士彥戰於呂梁大破之斬獲萬計方欲進圖彭城是時宣帝銳意河南以爲指麾可定景歷諫稱師老將驕不宜過窮遠略宣帝惡其沮衆大怒猶以朝廷舊臣不深罪責出爲宣遠將軍豫章內史未行爲飛章所劾以在省之日賊汗狼藉帝令有司按問景歷但承其半於是御史中丞宗元饒奏曰臣聞士之行己忠以事上廉以持身苟違斯道刑茲罔赦謹按宣遠將軍豫章內史新豐縣開國侯景歷因藉多幸豫奉興王皇運權輿頗參締構天嘉之世賊賄狼藉聖恩錄用許以更鳴裂壞崇階不遠斯復不能改節自勵以報曲成遂能專擅貪汗彰於遠近

一則已甚其可再乎宜寘刑書以明秋憲臣等參議以見事免景鐘所居官下鴻臚削爵土謹奉白簡以聞詔曰可於是徙居會稽及吳明徹敗帝思景歷前言即日追還復以爲征南鄱陽王諮議參軍數日遷員外散騎常侍兼御史中丞復本封爵入守度支尙書舊式拜官在午後景歷拜日適值輿駕幸玄武觀在位皆侍宴帝恐景歷不豫特令早拜其見重如此是歲以疾卒官時年六十贈太常卿諡曰敬十三年改葬重贈中領軍禎明元年配享武帝廟廷二年輿駕親幸其宅重贈景歷侍中中撫將軍諡曰忠敬給鼓吹一部并於墓所立碑景歷屬文不尙雕靡而長於叙事應機敏速爲當世所稱有文集三十卷江大權字伯謀仕至少府封四會縣伯太建二
年卒子通直散騎常侍

陳書

後梁

蔡大寶字敬位濟陽考城人祖履齊尙書祠部郎父點梁尙書儀曹郎南兖州別駕大寶少孤而篤學不倦善屬文初以明經對策第一釋褐武陵王國佐常侍嘗以書

干僕射徐勉勉大賞異乃令與子遊處所有墳藉盡以給之遂博覽羣書學無不綜
蕭詧初出第勉仍薦大寶爲侍讀兼掌記室尋除尙書儀曹郎蕭詧出鎮會稽大寶
詣選曹求諮議不得以爲記室大寶攘臂而出曰不爲孫秀非人也詧蒞襄陽遷諮
議參軍謀謨皆自大寶出及梁元與河東王譽結隙詧令大寶使江陵以觀之梁元
素知大寶見之甚悅乃示所制玄覽賦令注解焉三日而畢梁元大嗟賞之贈遺甚
厚大寶還白詧云湘東必有異圖禍亂將作不可下援臺城詧納之及詧於江陵稱
帝爲侍中尙書令參掌選事進位柱國軍師將軍封安豐縣侯蕭歸嗣位册授司空
中書監中權大將軍領吏部尙書固讓司許之加特進歸之三年卒及葬歸三臨其
喪贈司徒進爵爲公諡曰文凱配食詧廟大寶性嚴整有智謀雅達政事文辭瞻速
詧之章表書記教令詔册並大寶專掌之詧推心委任以爲謀主時人以詧之有大
寶猶劉先主之有孔明焉所著文集三十卷及尙書義疏並行於世有四子次子延
壽有器識博涉經籍尤善當世之務尙詧女宣城公主歷中書郎尙書右丞吏部郎

御史中丞從蕭琮入隋授開府儀同三司祕書丞終於成州刺史大寶弟大業敬道有至行位散騎常侍衛尉卿都官尙書太常卿卒贈金紫光祿大夫諡曰簡有三子允公最知名位太子舍人梁滅入陳爲尙書庫部郎陳亡仕隋起居舍人

北史

宋

劉隨字仲豫開封考城人以進士及第爲永康軍判官軍無城堞每伐巨木爲柵壞輒以他木易之頗用民力隨因令環植楊柳數十萬株使相連屬以爲限界民遂得不擾屬縣令受賕鬻獄轉運使李士衡託令於隨不從士衡憤怒乃奏隨苛刻不堪從政罷歸不得調初西南夷市馬入官苦吏誅索隨爲繩按之旣罷夷人數百訴於轉運使曰吾父何在事聞乃得調後改大理寺丞爲詳斷官李溥以賊敗事連權貴有司希旨不窮治隨請再劾之卒抵溥罪晁迴薦通判益州呂夷簡安撫川陝又言其材以太常博士改右正言數月坐嘗爲開封府發解巡捕官而不察舉人私以策辭相授降監濟州稅稍徙通判晉州還朝遷右司諫爲三司戶部判官隨在諫職數

言事嘗言今之所切在於納諫其餘守常安靖而已又奏頻年水旱咎在執事大臣忿爭不和請察王欽若等所爭爲辨曲直又因性變言國家本支蕃衍而安定王之外封策未行望擇賢者用唐故事增廣嗣王郡王之封以慰祖宗意時下召蜀中選優人補教坊隨以爲賤工不足辱詔書又劾奏江淮發運使鍾離瑾載奇花怪石數十艘納禁中及賂權貴累疏論丁謂姦邪不宜還之內地胡則爲之黨旣以罪出陳州不當復進職王欽若旣死詔塑其像茅山列於仙官隨言欽若賊污無忌憚考其行豈神仙耶宜察其妄又言李維以詞臣求換武職非所以勵廉節前後所論甚衆帝旣益習天下事而太后猶未歸政隨請軍國常務專稟帝旨又諫太后不宜數幸外家太后不悅會隨請外出知濟州改起居郎久之遷尙書刑部員外郎入兼侍御史知雜事上言比年庶官僥倖請託或對見之際涕泗祈恩或績效甚微銜鬻要賞亦有藩翰之臣位尊職重表不遜請求靡厭按察之司燕安顧望以容奸爲大體以舉職爲近名以巧詐爲賢以恬退爲拙以至貪殘者瀆于貨財老疾者不知止足請

行申徹之法朝廷爲下詔戒中外未幾權同判吏部流內銓以長定格從事吏不得爲奸改三司鹽鐵副使使契丹以病足瘳辭不能拜及還爲有司劾奏奪一官出知信州徙宜州再遷工部郎中知應天府召爲戶部副使改天章閣待制不旬日卒隨與孔道輔曹修古同時爲言事官皆以清直聞隨臨事明銳敢行在蜀人號爲水晶燈籠初使契丹還會貶官收所得馬十五乘旣卒帝憐其家貧賜錢六十萬

宋史

傅求字命之考城人進士甲科通判泗州淮水溢毀城朝廷遣廷遣中使護築絕淮取土道遠度用兵六十萬求相汴堤旁有高埠夷之得土載以回舟省工費殆半徙大名府守呂夷簡委以事夷簡入相薦其才擢知宿州提占江西益州刑獄爲梓州路轉運使夷獠寇合江鈐轄司會兵掩擊求馳往按所以狀乃縣吏冒取播州田獠故恐而判卽黥吏置領南夷人聞之散去益州文彥博上其狀進秩徙陝西關中行當十鐵錢盜鑄不可計求請變法時州縣已散二百八十萬緡亟下令更爲當三民出不意蕩產失業多自經死然盜鑄遂止自康定用兵移稅輸邊民力大困求令輸

本州而轉錢以供邊糴民受其惠而兵食亦足召爲戶部副使隴右蕃酉蘭種獻古渭州地秦州范祥納之請繕城屯兵又括熟戶田諸羌斬之相率叛夏人欲得渭地又移文來索後帥張昇以祥貪利生事請棄之詔求往事求以爲城已訖役且已得而棄非所以強國威乃詔諭羌衆反其田報夏人以渭非其有不應索正其封疆而還兵遂解進天章閣待制陝西都轉運使加龍圖閣直學士知慶州環之定邊砦蕃官蘇恩以小過疑懼而遁將佐議致討涇原旣出師境上求謂恩非素攜二者乘以兵必起邊患但遣裨將從十數卒扣其帳開以禍福恩感泣還砦如初入判太常寺權發遣開封府遷樞密直學士知定州復以龍圖閣學士權開封求本有吏能幹局至是春秋浸高且病曠三司大將錢吉密殺妹爲隣所告求不能決反坐告者又斷獄數差失御史言其不勝任出知兗州卒年七十一

列傳三 宦績

仇覽

史弼

蔡睦

江秉之

江謐

江祿

江興

江悅之
子文遙
文遠附

蔡徵

曹世貴

樊鎮

樊均

焦璠

李頎

李鎰

王鵬

李頎

張應節

甯東

李讓

楊國卿

底蘊

董漢儒

李凝忠

孫應辰

辛勤

蘇紳

陳所聞

甯嘉會

鄭士春

鄭可久

甯嘉猷

張家瑞

王佐才

甯象斗

李如蘭

陳陞顯

李實蕝

陳毅
子苗實附

王鼎

王掖

王如奐

王句

王汝礪

王貫三

張心廉

許虎變子慶常慶義

蔡文懋許蕙附

吳運成

漢

仇覽字季智一名香陳留考城人少爲書生淳默鄉里無知者年四十縣召補吏選爲蒲亭長勸人生業爲制科令至於果菜爲限鷄犬有數農事旣畢乃令子弟羣居還就黌學其剽輕游恣者皆役以田桑嚴設科罰躬助喪事賑恤窮寡期年稱大化覽初到亭人有陳元者獨與母居而母詣覽告元不孝覽驚曰吾近日過舍廬落整頓耕耘以時此非惡人當是教化未及至耳母守寡養孤苦身投老奈何肆忿於一朝欲致子以不義乎母聞感悔涕泣而去覽乃觀到元家與其母子飲因爲陳人倫孝行譬以禍福之言元卒成孝子鄉邑爲之諺曰父母何在在我庭化我鳴臬哺所生時考城令河內王奐聞其事齎送太學語詳奐傳覽入大學時諸生同郡符融有高名與覽比宇賓客盈室覽常自守不與融言融觀其容止心獨奇之乃謂曰與先生同郡壤隣房牖今京師英雄四集志士結交之秋雖務經學守之何固覽乃正色

曰：「入子修設太學，豈但使人游談其中，高揖而去，不復與言？後融以告郭林宗，林宗因與融齎刺，號房謁之，遂請留宿。林宗嗟歎下床，爲拜覽學畢，歸鄉里。州郡並請，皆以疾辭。雖在宴居，必以禮自整。妻子有過，輒免冠自責。妻子庭謝，候覽冠乃敢升堂。家中莫見喜怒聲色之異。後徵方正，遇疾而卒。三子皆有文史才，少子玄最知名。」後

漢書循吏傳

史弼字公謙，考城人。父敞，另有傳。少篤學，聚徒數百。仕州郡，辟公府，遷北軍中侯。桓帝弟渤海王悝素行險僻，僭傲不法，乃上封事曰：「臣聞帝王之與親戚愛雖隆，必示之以威體，雖貴必禁之以度。如是和睦之道，興骨肉之恩。遂昔周襄王恣甘，昭公孝景帝驕梁孝王，而二帝階寵，終用悖慢。卒周有播蕩之禍，漢有袁盎之變，竊聞渤海王悝憑至親之屬，恃偏私之愛，失奉上之節，有僭慢之心，外聚剽輕之徒，內荒酒色，出入無常，所與羣居，皆有口無行，或家之棄子，或朝之斥臣，必有羊勝、伍被之變。州司傅相不能匡輔，陛下隆於友于，不忍遏絕，恐遂滋蔓，爲害益大。乞露臣奏，宣示百。」

僚使臣得於清朝明言其失然後詔公卿平處其法法決罪定乃下不忍之詔臣下固執然後少有所許如是則聖朝無傷親之譏渤海有享國之慶不然懼大獄將與使者相望於路矣臣職典禁兵備禦非常而妄知藩國干犯至戚罪不容誅不勝憤懣謹冒死以聞帝以至親不忍下其事後悻竟坐逆謀貶爲癭陶王弼遷尙書出爲平原相詔書下舉鈎黨郡國所奏相連及者多至數百惟弼獨無所上詔書前後切却州郡覲筭椽史從事坐傳責曰詔書疾惡黨人旨意懇惻青州六郡其五有黨近國甘陵亦考南北部平原何理而得獨無弼曰先王疆理天下畫界分境水土異齊風俗不同它郡自有平原自無胡可相比若承望上司誣陷善良濫罰淫刑以逞非理則平原之人戶可爲黨有死而已所不能也從事大怒即收郡僚職逐舉奏弼會黨中解弼以俸贖罪得免濟活者千餘人弼爲政特挫抑強豪其小民有罪多所容貸遷河東太守被一切詔書當舉孝廉弼知多權貴請託乃豫勅斷絕書屬中常侍侯覽遣諸生齎書請之并求假鹽稅積日不得通生乃說以它事謁畢而因述覽書

弼乃大怒曰太守忝荷重任重選士報國爾何人而僞詐無狀命左右引出楚捶數百府丞椽史十餘人皆諫於庭弼不對遂付安邑獄即日考殺之侯覽大怒遂詐作飛章下司隸誣弼誅謗檻車徵吏人莫近者惟前孝廉裴瑜送到請繩之間大言於道旁曰明府擢折庸臣選德報國如其獲罪足以垂名竹帛不憂不懼弼曰誰爲荼苦其甘如薺昔人刎頸九死不恨及下庭尉詔獄平原吏人奔走詣闕訟之又前孝廉魏邵毀變形服詐爲家僮贍護於弼弼遂受誣事當棄市邵與同郡人賣郡邸行賂於侯覽得減死罪一等論輸左校時人或譏曰平原行貨以免君無乃蚩乎陶丘洪曰昔文王羨里囹散懷金史弼遭患義夫獻寶亦何疑焉於是議者乃息刑竟歸田里稱病閉門不出數爲公卿所薦議郎何休又訟弼有幹國之器宜登台相徵拜議郎候覽等惡之光和中出爲彭城相會病卒裴瑜位至尙書

後漢書
循吏傳

魏

蔡睦字子篤考城人與王粲同遊荊州子篤歸粲贈以詩曰翼翼飛鸞載飛載東我

友云徂言戾舊邦舫舟翩翩以沂大江蔚矣荒塗時行靡通慨我懷慕君子所同悠
悠世路亂離多阻濟岱江行邈焉異處風流雲散一別如兩人生實難願其弗與瞻
望遐路允企伊佇烈烈冬日蕭蕭淒風潛鱗在淵歸雁在軒苟非鴻鵬孰能飛翻雖
則進慕予思罔宣瞻望東路慘愴增歎率彼江流爰逝靡期君子信誓不遷於時及
子同僚生死固之何以贈行言授斯詩中心孔悼涕泣漣洏嗟爾君子如何勿思後
爲魏尙書有聲於世

文選

宋

江秉之字玄叔濟陽考城人祖迪晉太常父纂給事中秉之少孤弟妹七人並皆幼
穉撫育姻娶罄其心力初爲劉穆之丹陽前軍府參軍武帝督徐州轉主簿仍爲世
子中軍參事宋受禪隨例爲員外散騎侍郎補太子詹事丞少帝卽位入爲尙書都
官郎出爲永世烏程令以善政著名東土徵建康令爲治嚴察京邑肅然殷景仁爲
領軍請爲司馬復出爲山陰令民戶三萬政事煩擾訟讞殷積階庭常數百人秉之

御繁以簡常得無事朱世唯顧凱之亦以省務著績其餘雖復刑政循理而未能簡事以在縣有能遷補新安太守元嘉十二年轉任臨海並以簡約見稱所得祿秩悉散之親故妻子常饑寒人有勸其營田者秉之正色曰食祿之家豈可與農人競利在郡作書案一枚及去官留以付庫十七年卒時年六十子徽尚書都官郎吳令元凶殺徐湛之徽以黨與見誅子謐昇明末爲尚書吏部郎

宋書

江謐字令和濟陽考城人父徽爲太初所殺謐係尚方孝武平京邑乃得出解褐奉朝請輔國行參軍于湖令強濟稱職宋明帝卽位以爲驃騎參軍轉尚書度支郎俄遷右丞兼比部郎出爲建平王景素冠軍長史長沙內史行湘州事徵還爲正員郎右軍將軍太祖領南兖州謐爲鎮軍長史廣陵太守入爲遊擊將軍領尚書左丞昇明元年遷黃門侍郎沈攸之事起議加太祖黃鉞謐所建也事平遷吏部郎稍被親侍遷太尉諮議領錄事參軍齊台建爲右衛將軍建元元年遷侍中出爲臨川王平西長史冠軍將軍長沙內史行湘州留事旣而豫章王疑領湘州以謐爲長史封永

新縣伯三年爲左民尙書尋遷掌吏部世祖卽位出爲征南將軍鎮北長史南東海太守未發御史中丞沈沖奏謚前後罪請免官削爵土收送廷尉獄治罪詔賜死年

五十二 宋書

齊

江祿字彥遐考城人兄曇字彥德有器度位侍中太子詹事祿幼篤學工書善琴位太子洗馬湘東王錄事參軍以氣陵王王深憾焉後爲唐侯相子徽有文采 齊書

梁

江興字休恭考城人仕鎮北府水曹參軍立身貞白操業清廉初爲沮漳令政平訟理百姓愛之旋爲淮海巡行使杜絕賄賂釐剔宿弊蠹吏巨豪望風畏肅同族江淹

表薦於朝 劉孝儀爲江
侍中薦士表

後魏

江悅之字彥和濟陽考城人七世祖統晉散騎常侍劉淵石勒之亂司徒渡江祖興

之父範之並爲劉裕所誅悅之少孤仕劉駿歷諸王參軍好兵書有將略善待士有部曲數百人蕭道成初以悅之爲荊州征西府中兵參軍領臺軍主遷屯騎校尉轉後軍將軍部曲稍衆千有餘人蕭一遷戍漢中就遷輔國將軍蕭衍初劉季連據蜀反叛悅之率部曲及梁秦之衆討滅之以功進號冠軍將軍武興氏破白馬進圖南鄭悅之率軍拒戰大破氏衆還復白馬衍秦梁二州刺史莊丘黑死夏侯道遷與悅之及龐樹軍主李忻榮張元亮士孫天與等謀以梁州內附既殺蕭衍使者及楊靈珍衍華陽太守尹天寶率衆向州城悅之與樹忻榮勒衆逆戰爲天寶所敗遂圍南鄭戰經四日衆心危阻咸懷離貳悅之盡以家財散賞士卒身當矢刃晝夜督戰會武興軍至天寶敗走道遷之克全勳款悅之實有力焉正始二年夏與道遷俱至洛陽尋卒年六十一贈輔國將軍梁州刺史追封安平縣開國子食三百戶諡曰莊悅之二子文遙文遠文遙少有大度輕財好士士多歸之道遷之圖楊靈珍也文遙奮劍請行遂手斬靈珍正始二年除步兵校尉遭父憂解官永平初襲封拜前軍出爲

咸陽太守勤於禮接終日坐聽事至者見之假以恩顏屏人密問於是民所疾苦大盜姓名姦猾吏長無不知悉郡中震肅姦劫息止治爲雍州諸郡之最徵拜驍騎將軍輔國將軍進號征虜將軍肅宗初拜平原太守在郡六年政理如在咸陽遷後將軍安州刺史文遙善於綏納甚得物情時村落周葛榮等相繼叛逆自幽燕以南悉皆淪陷惟文遙介在羣賊之外孤城獨守鳩集荒餘且耕且戰百姓皆樂爲用建義元年七月遘疾卒於州年五十五長史許思祖等以文遙遺愛在民復推其子果行州事既攝州任乃遣使奉表莊帝嘉之除果通直散騎侍郎假節龍驤將軍行安州事當州都督既而賊勢轉盛臺援不接果以阻隔疆寇內徙無由乃攜諸弟并率城民東奔高麗大平中詔高麗送果等元象中乃得還朝文遠善騎射勇於攻戰以軍勳致效自給事中稍遷中散大夫龍驤將軍

魏書

陳

蔡徵字希詳考城人聰敏年六歲詣梁吏部尙書河南褚翔嗟其穎悟七歲居母喪

如成人禮繼母劉氏性妬視之不以道徵供事益謹仕陳累遷太子中書舍人兼東宮領直襲封豐新侯後主器其才幹任寄日重遷吏部尙書入隋除太常丞歷尙書戶部儀曹轉給事郎卒子翼仕隋爲東宮學士

陳書

元

曹世貴字仲明睢州考城人父鸞以材武爲劉整所薦官規運庫提舉世貴由翰林國史院書寫授元帥府提控世祖遣諸王塔察兒伐高麗平章政事趙璧行征東省以世貴爲行省宣差使於高麗其臣林衍陳兵以逆世貴厲聲曰汝海邦小夷敢脅天子之使是反也立斬十餘人衍等驚服擢忠翊校尉武城令有惠政民勒石頌之遷同知隆興州羣盜據山洞官軍不能討使世貴招之卽相率來降累遷朝列大夫福建閩海道提刑按察副使糾行省平章政事默勒賊民蠹政詔誅之遷中順大夫興化路總管改福建都轉運鹽使卒年六十一子定國江陰尹靖國同知武昌權茶

提舉

新元史

附轉運鹽使曹公神道碑

元姚燧作

維曹肇國則自文王子振鐸以武王弟故與唐康管蔡霍屬以別之鈞曰叔春秋十二國曹猶存其後子孫雖散之四方亦皆曰吾先人顯諸侯捨姬氏惟國姓至參以沛吏佐高帝興漢功侯平陽國故絕式續魏文帝不篡漢以有中土者凡四傳四十六年自是聞人史不絕書至金初曾祖儀貫籍睢之考城以明罰執法爲郡功曹生蔚解試魁開封生鸞以材武受知皇元帥劉公引爲天下規運提舉妣夫人赫舍哩氏金源貴族生公諱世貴字仲明由翰林國史院書寫爲元帥府提控初高麗自太祖世納款而國王穆呼哩方總兵歲東征不休虜劉人民而臧獲其子女高麗患棄王城徙其民江華島世祖哀其首服爲罷歲征使復王城今瀋王之祖惑其令公林演之說而安其所不以時徙帝怒命嗣國王塔納格爾兵其界遣平章政事趙璧行征東省公爲行省宣使入諭演與同惡豎惟茂禮書宋松禮侍郎洪憲陳兵以逆公叱責曰汝海邦小夷敢以威脅天子之使則反矣戮十

餘人縛演致闕國王導之入覲帝嘉其忠勅授忠翊校尉曹之武城令有惠政其民勒石頌之凡三遷皆同知劇郡吉州歲荒發庾以賑饑羸隆興羣盜據華洞數調官軍討不能平遣公諭招之悉棄險來下皆齒平民建康去以母喪會廷議凡前峻官者例隲之改溫之治中以末終祥禪辭明年官朝列福建閩海道提刑按察副使職乎民者進爲風紀非聞望出常調者憲台不輕以畀至則糾閩省平章默勒賊民蠹政下詔誅之彼其同列大爲振肅滿秩官中順遷興化路總管內勸農事凡民爲羣盜鍾明亮劫脅汚染進討將士取而奴者無慮千人皆汰之遷福建都轉運鹽使未上而卒實大德六年六月二十有九日也年六十一塋太平之須城登賢鄉夫人趙氏南京提舉趙晉之女妻道母儀姻里範之五子定國尹江陰州兼勸農事靖國同知武昌等權茶提舉皆夫人出次室葛正國安國輔國皆葛出方勵學女孫三人銘曰率土之遯將師侯牧有沒其齒天威不覲公一布衣從省東征問罪高麗負羈以行檄先俘海徙江華島敢拒爲亂魁脅縛討王孫導

之入告爲猷甚爲帝嘉邑令用優旣試牛刀易猛以惠尋峻其階吉洪昇倅言拯
歲荒洪咨諭降持憲于閩渠兇斧元爲牧興化凡寇滋蔓波汗平民悉賴以漵轉
而閩漕鹺利是專甲子方周白日遽捐平昔履歷盡萃乎此在邦必聞可無媿已
而所未白在家亦聞衰俗滔滔在官幸身親未卒哭期月已出王事是從笑言自
如公則異諸昇護輶車改溫又辭練服未除若是自致庶古少跂化民興行足裨
至治須登鄉賢而祖有阡碑以表之庸信其傳

明

樊鎮考城人明洪武中進士賦性剛直博通經史授監察御史振揚風紀有能聲歷
任浙江參政山西右布政所至廉幹勤敏爲時所稱

陳志

樊均字仲平考城人歲貢依親赴京違限問充邊方均率同事六百餘人列懇于廷
明太祖怒甚衆皆股栗均神色自若從容奏曰臣等年少輕犯憲章伏乞重恩許臣
自新竭力讀書以圖補報上嘉其志盡釋之命侍臣大書姓名揭于奉天門以俟悛

均初授陝西石泉知縣虎伏灌園異政累著歷官至工部郎中致仕後以治河功從

祀平江伯廟庭

陳志

焦璠考城人授鴻臚寺序班陞中書舍人成化乙丑與修英宗實錄成受白金彩幣之賜授吏部考功員外郎

陳志

李頎字文嘉考城人弘治己酉科舉人性剛方初任浙江海鹽知縣改知於潛縣歷署仁和餘杭縣事見忤權奸再起知山西靈丘縣所在廉慎公勤甚有聲譽事母崔氏至孝母喪哀毀盡禮廬墓三年手書孝經百餘卷以教鄉里時有瑞麥一莖五穗瓜一帶五實之異人以爲孝感所致有司上其事於朝旌表工部郎中

陳志

李鎰考城人任直隸冀州訓導陞山西蒲縣教諭捐俸修學施財濟貧卒後韓弼王三錫皆詣考拜泣墓前韓王皆蒲產也其感士類如此

陳志

王鵬字萬里考城人正德進士任順天大興縣丞陞陝西平涼府通判政聲大著民

歌不忘

陳志

李頤考城人聰敏嗜學事兄嫂如父母謙遜溫和與物無爭任陝西醴泉縣訓導旋補教諭誨人不倦多士懷之

陳志

張應節考城人正德進士任山東兗州府訓導再任常清縣訓導陞陝西宜君縣教諭德性純粹舉動剛方深得師範

陳志

甯東考城人終直隸延慶衛教授設誠教士捐貲濟貧尤精岐黃術年九十四卒

陳志

李讓字允恭考城人歲貢生孝友純厚除山西文水知縣丁內艱服闋補直隸河間知縣廉明剛果守道不屈吏民愛之如父母太常寺少卿孫賢稱愛百姓如己子治公事如家事雖古卓魯何過也

陳志

楊國卿字世丞考城人正德丙子科舉人賦性剛明制行狷介孝親友弟兼長於詩歌古文筮仕石泉令期年百廢俱興如振起文風杜絕淫俗簡徭革贖扶弱鋤強皆政績之表表者也尋以直道忤時解綬東歸惟圖書數卷而已居鄉嗜學不倦日與

後生講解成就甚衆

陳志

底蘊字汝章考城人進士初令興化著能聲調改咸陽三邊要衝蘊舉利弊之大者行之治渭河理冤獄以績最擢禮科給事中上疏誅逆黨正母儀創大理明祀典嘉靖改元轉左右給事中危言激論有加於前讀河曲諫草令人動色出守太平招流亡清賦役禁黃山淫祀歲省民膏以數萬計旋丁艱歸服闋補安慶歷官至巡撫甘肅始命下行經紅城子等隘口忽遇敵人數萬入寇蘊倉猝調兵運奇制勝既至甘肅蘊命將出師斬獲無算自是敵人不復南下蘊竟以勞成疾卒於涼州

陳志

董漢儒字道夫考城人生而穎異讀書常徹夜人號爲董不眠從父宦遊北學於趙魏豪儁雲集爭相詘下又號爲董鐵漢比登制科名動京國初牧通州曲意拊循如均馬政修水利清賦役崇教化皆其大政遷南司徒財計盈縮綜畫多方出守漢中有遺愛錄至昌治河患馘巨寇以妥善良比更建昌制宮亭之險而衆便行役修濂溪之祀而士知向方觀察滇南身先士衆勦敵以靖邊徼所至政績可考因瘴癘引

疾乞休歸里杜門惟聞邑有大利害所關力疾抗議於部使者期濟乃已性孝友筮仕後以田廬讓二弟更置義產廣惠宗黨鄉人至今稱之

陳志

李凝忠字本孝考城人嘉靖丙戌科進士任上津縣令調繁襄陽頗有政聲後行取

至京故

陳志

孫應辰字拱極考城人嘉靖己丑科進士授山東濰縣令廉能茂著民有誣坐人命抵罪累年弗能辯應辰察其冤力白於上官遂得釋濰地素爲王府侵爲鴟鴨食民甚苦之應辰檢勘合申革永除民害與前任楊宜並稱良吏百姓繪像祀之尋陞南京戶部主事轉刑部員外郎皆有聲出守永平值遼東歉巡撫閉糴應辰曰遼人即吾人矧京師左臂大勢在遼輕遼是輕京師也請無遏糴議上巡撫忘其抗已遂解綬歸孝友著聞德望隆重遐邇景之

陳志

辛勤考城人歲貢生任直隸肅寧縣訓導代巡王公獎曰行慎教端

陳志

蘇紳考城人嘉靖壬午舉人任武成鄆西二縣知縣政績昭著

陳志

陳所聞號晉齋考城人萬歷己丑科舉人任冀城令寬洪簡易玉潔冰清陞戶部主事

陳志

甯嘉會字君立號範圍考城人萬歷乙卯舉人初授山東海豐縣知縣救荒恤災清平明允士民有青天之頌調直隸南和縣著有世鑒錄一卷詩稿二卷

採訪

鄭士春字太卿考城人歲貢生任陝西永壽縣知縣鋤奸革弊作士恤民以老致仕

陳志

鄭可久考城人歲貢生任山東單縣訓導陞范縣教諭有盜官庫四百金潛埋學宮察明悉還官庫兩院獎其廉潔匾其署曰義重千金

陳志

甯嘉猷字君猷別號屏毅考城人萬歷乙酉鄉試舉人丙戌進士初授湖廣石首縣知縣調山東諸城縣知縣剛方忤時陞湖廣黃州府同知致仕家居二十餘載杜門謝客手不釋卷當六旬時父母俱存嘗作小詞命瞽者歌之以娛親積久成帙自題曰睡起漫興遠近傳焉

陳志

張家瑞字庭麟考城人天資英敏爲文豪邁有奇氣明萬曆戊子舉人授山東費縣知縣費俗悍地澆素稱難治家瑞至編派減省之荒地開墾之流民招撫之衙役振肅之煑粥以救饑民積谷以儲軍餉立文社以課士旌節義之勵風俗有唐姓訟數年不解孟氏爲邑大豪罪惡貫盈悉判決而擒治之士民頌德時聞運壅淤中丞曹某命費等六縣修之且恐費民財家瑞捐俸募民無秋毫費上憲獎之曰功甲六邑定庸首薦其治費也秉公如衡纖毫不屈鄉宦詆毀之陰行銓部秉筆使者以詆毀爲輿論太守萬極力救曰依輿論天下無公道矣卒以此去官家瑞曰吾居官任政皆真心無妄行廢莫非命也遂聯友人結爲詩社風流爾雅飲食車馬一如布衣時言行維謹與鄉親處強梁者兢兢恐得罪良善者藹藹多真情欺我者讓之使自愧賴我者含之積爲德遇貧死無棺者與之棺冬夏無衣者與之衣孜孜爲善惟日不足嘗有言曰出一喪元氣進士不若出一積陰德平民福薄者必刻薄刻薄則福愈薄福厚者必寬厚寬厚則福愈厚嗜異味者必得異病挾怪性者必得怪證作陰

謀者必得陰禍作奇態者必得奇窮識者以爲名言云

採訪

王佐才字翼辰考城人歲貢生任邕縣訓導迎孀姑而養老訓賈甥以成名續族弟王茂才兩次之婚供蒙師婁文川終身之養贖宋化池之女教程希魯之生力爭邕生石國璽之中傷賻同官郭金城之客死鄉飲十三次壽考七十餘

陳志

清

甯象斗字玄象號昭區考城人順治戊子歲貢辛卯授新野縣訓導丙申冬陞固始縣教諭戊子致仕旋里時鬻產爲路費囊中止有手抄詩文數卷而已

採訪

李如蘭字晉卿考城人順治丙戌科舉人任和州知州善事繼母立義學成多士其居官也革書役之積弊省民財數萬金施藥粥以濟人活衆生者幾千戶修文廟建書院士風丕振和人立碑頌之子際春邑庠生德行繼美岐黃壽世

陳志

陳陞顯字君遴考城人初由副榜考授知縣辛卯科舉人任淇縣教諭學行秉優甘守淡泊事父母生死以禮撫弟姪田宅不私居家教授生徒秉鐸作養士子成就甚

衆著有四書全集講義子大廷輯鐫行世

陳志

李實蕘字美如考城人舉人任溫縣訓導署濟源縣事陞項城教諭丁艱服闋補確山教諭陞直隸隆平知縣孝友敦篤善行多端賑災荒而救瘟疫瘞積屍以恤殘傷司訓諭則捐俸作人桃李盈門膺民牧則奉公潔己歌頌載道餘徽不泯崇祀鄉賢

陳志

陳毅字士可考城人幼不嬉戲嗜學弱冠爲庠生未幾父母相繼逝顛沛流離之際營葬靡不盡力三年風木悲深乃負土築墳崇數尺遠近觀者稱純孝云值明季世亂復舊廬撫孤姪如己子化仇暴鄉里重之爲人有器量抱偉略能拯人於厄值學使者校士營丁構隙士子遭辱毅以片言息其禍清室定鼎始爲制舉文中順治辛卯副車康熙癸丑舉人庚申授陝州學正與士子講孝弟忠信之行立考課法作養無遺類餽遺概置弗論己已遷靜海知縣至官以清廉自矢民貧生計維艱毅曰先寬養民力勿削脂膏以自奉後可圖也平市價官與民等由是商賈願出其塗者數

百家歲旱力請緩征蠲租當其時有逃人者爲靜民害且久毅令捕者勿累民獲逃輒言得諸道塗孤寺或窮鄉僻壤訊明立解良民無遭攀陷境內謐如靜邑密邇天津舊日鹽引最爲商民患俄有分派靜海議羣情洶洶毅曰人情狃於便安不足謀除爾患息吾事顧憚勞勩乎據民疾苦言於視鹺使者甚力引不得加民賴以寧在任三月卒子苗實康熙壬子舉人丁卯授饒陽知縣立誓廉勤卒踐其言

錄寶克勤陳毅墓志

銘及深州風土記

王鼎字某考城人歲貢生至性純篤弟罷幼遲鈍多方教誨迄於成立生員李鐸等其甥也幼孤苦撫養保護不避艱險清初匪患燎原其隣女爲亂軍所掠百計贖回得以全活康熙間任安陽訓導修飭學宮單寒被德秩滿歸來囊橐蕭然八十餘卒

節錄陳志

王掖字霞照考城人康熙癸巳舉人任江西瑞州府新昌縣知縣有德政民作歌頌之其辭曰公心本忠信令出如山盟不事誓天日自堪質神明公廉飲耶水風清兩

袖涼却遺無塵瘵明月照琴堂公崇儒設學多士沐陶成几席時提命絃歌到處聲
公試縣冰鑑論文秉法程金針神暗度後學喜開明公勤宣上諭逐條牖衆民婆心
殷化導不憚誨諄諄公獄片言折人在鏡中行得早安常業不久候公庭公事加詳
處再三體下情淵衷存敬慎鉅細總無輕公愛民如子鞭蒲不忍傷催科寓撫字歲
內樂輸將去官爲立生祠新邑城中 王氏家譜

王如奐字葵釐號肅雍考城人歲貢生康熙十九年任伊陽縣訓導立月課法捐俸
供士子饌薰其德而善良者幾千人見有餓莩即施錢賑之自安澹泊半歲凡三却
餽金有楊四知之稱未幾以疾致仕 錄常翼所
作墓志銘

王句字容叔又字容洲考城人年十九補博士弟子員康熙甲子舉人丙戌官河工
微員以病免戊子爲內閣中書舍人踰年假歸癸巳再入中書甲午同校順天鄉試
得揚州張符驤等十八人與修玉牒乙未告成雍正癸亥以賢勞加一級夏復被命
入簾不克辭其從子曉在京邸甚憂之以語張符驤符驤已爲庶吉士矣受句知性

伉爽尙義氣旣旬歸果病困以五月十九日卒年六十八當是時從子惟曉在長子
蘭慶方四歲次蘭蓀方二歲以素乏餘積幾無以殮且道遠不克歸里張符驤經紀
其喪則持曉以號於旬靈曰曉幸在此治先生喪將遂攜先生四歲二歲兩藐孤還
先生之鄉里符驤聞考城王氏故中州世家嫻於禮教羣從子弟如新邦輩皆名進
士裔庸詎不能與曉戮力同心以育藐孤於成卽風雨漂搖憂先生於地下非獨曉
之憂亦諸王氏之恥曉泣曰敢不如君言符驤又抱其四歲二歲兩孤徧贊於弔客
曰從來爲善無不報而遲速有時先生創義學施棉絮建奎星樓在京師又經紀喬
翰林劉別駕二人之喪此誼亦古人所許也何至不能食報於兩孤且先生以是爲
諸閣老及陽城尙書所器重交薦於朝雖柄用不及而名聞天子同鄉戶侍儀封公
閣學天中胡公侍御睢州湯君工部葵林竇君詹事運清楊君皆先生道義交往來
情好甚密凡此數君子當不以死生有異視也何至不能庇其兩孤弔客皆歎息泣
下曰必如君言符驤則又抱四歲二歲兩孤以諗諸弟子曰先生掌制誥十餘年諸

爲官於河南者孰不與先生通縞紵答殷勤此亦吾嘗所共聞也所不能育孤於成卽有風雨漂搖以憂先生於地下非惟諸君子之憂抑亦符驤之恥諸弟子皆哭失聲曰孰不如君言符驤卽歸其喪卹其孤世人比之侯芭於楊雄云

王君行狀

王汝礪字他山考城人山西滎河縣知縣汲子也汲卒汝礪方幼至性烝烝喪葬一遵於禮旣長貌魁梧多才略伉爽豪邁不與凡流伍納貲入太學主張家政事太夫人遇諸幼弟以孝友稱門以內怡怡如也雍正戊申河督稽曾筠治河求異才汝礪奉母命往稽器重之委署夏津主簿里民有遠出者妻父母奪女志令改適已訂婚期而夫前夕歸亟訴汝礪汝礪廉其實舉火白縣令首鞠是獄夫婦完聚如初旋遷內黃丞邑大水汝礪分任賑卹矢公矢慎全活者數萬戶是邑漕政叢脞汝礪承牒監理釐剔奸弊豪猾惴惴皆匿迹後數十年當事者猶奉典型云時進貢使諸艘凌轢河漕往來者或強洩閘水以病運河防使者沈某以汝礪多威重委以天井閘務汝礪執法相抗諸艘胥敬憚之一時有大王閘之謠改署滎澤承乾隆戊午擢東昌

上河倅旋改下河所轄衛河會漳汶合流每夏漲壞民田廬恩縣四女寺德州峭馬營向建滾水石壩開引渠洩衛抵老黃河入海每費水衛錢數百萬水退沙淤輒成平陸汝礪建議於渠口迎流挑濬寬深遞殺至尾閘極窄逼水攻沙水退而渠形宛然役夫受食僅百許緡而已衛無隄防瀕河苦無秋汝礪復請於兩岸築堰護田歲於農隙集民夫葺之民樂其利不煩號召有名其堰爲惠公爲公惠以誌不忘者改兗州泲河通判視事初運岸堤壞湖河匯若巨浸汝礪捐貲架木爲梁以濟輸輓然後牽菱畚補成之民瀕湖廬隄畔者悉蠲其稅東南交會曰三界湖貧民藝葦輸租視中地黃河溢多逃亡者汝礪牒請蠲租執事難之力請乃得免泲河下流接南省之邳州南省以水弱來告汝礪以湖水充裕當洩盈以濟鄰執事不可汝礪曰事關天庾吏當和衷職已報可願掛冠以明不欺既而兩省漕艫遄行直聲馳南北沂州告急大吏請修水利以代賑擢汝礪沂州同知督其役之任後不私一錢全活災黎無算工竣捐俸助賑復活多人遠近歌來暮焉移兗州運河同知以捕蝗受知撫憲

委攝濟寧州事胥吏侵收漕米積弊成習汝礪曰木朽則蠹生堅明約束令納者自量概吏役垂手里民荷贏而歸刊石頌德歡聲雷動會大計以卓異入覲註銓知府遭母喪去職服闋未補官卒

王氏家譜

王貫三字配公號蘧菴又號念菴考城人代有隱德少凝重不與羣兒儔伍父鼎器之曰昌吾門者其是子乎稍長勤學不怠爲文英奇磊落知縣程夢簡得其文稱賞之且薦於府值督學史逸裘遂拔置第一入庠延入署中與子姪講讀討論中康熙己酉舉人再上春官成進士考授中書舍人需次待補辛酉分校順天鄉試拔取皆一時名俊既補中翰迎養其父於京邸俄遭內外艱哀毀逾禮經營葬事竭盡心力服闋復官癸酉典試四川取收皆巴蜀之傑旋補戶部清吏司主事壬午又同考順天鄉試愈加精汰得雲中官高維新十餘人皆名宿也是科復同考順天武鄉試得二十九人而解元王道智則其房首也宦京師三十餘年冷然淡泊始終一節甘貧如飴會監督寶泉局或謂可以稍潤囊橐矣而貫三則剔奸除蠱一錢不入私人始

知其廉潔之操得於性成非矯飾也貫三早歲艱於子晚乃生子喜曰吾願足矣卽治裝還里尙書韓莢送之有登仙之羨是歲上頒賜御書以臨董其昌五言詩賜貫三貫三官囊惟此物耳家居茅茨蕭然土垣頽址無改於舊其高風如明鹿邑軒輓臨漳石璞近今殆難其偶也康熙五十九年十月卒年七十有三節錄學愚齋文集

張心廉字牧潔考城人道光乙酉拔貢考取教習庚子副車任山東臨朐縣知縣清慎慈惠輿情愛戴文廟考棚關帝廟倉廩養濟院普濟院俱捐俸修葺後建書院延山長督課生徒自撰大堂聯云眼前皆赤子頭上有青天在任四年民公頌曰公正嚴明所作詩草四卷律詩二卷古體一卷詩話雜識一卷行世採訪

許虎變字炳文考城許河寨人同治丁卯舉人辛未成進士卽用知縣籤分山東性厚重尙任俠其同歲生雲南人知齊河縣罷官暴卒濟南子幼不能歸同鄉無視者虎變徑往檢橐得遺金簿之明年其弟至還金與簿其弟大痛曰非君王氏今無處矣謝以幣不授巡撫文彬得其爲人委署寧海縣尋移金鄉縣卒補招遠縣始爲寧

海虎變以當時目進士爲書生曰書生果無用耶吾求無辜書生耳乃鑄清慎勤私印自勗治民課士心誠以求案無留牘獄不羈留富室蔡氏犯姦以重賄進却之科其罪如科陳氏故世家父子昆弟互訟虎變引韓延壽傳自傷曰咎在令也反覆啓發遂泣悔罷訟爲金鄉黠民張甲誣嘉詳李乙通賊捕繫諸官虎變察賊內質符不合杖捕盡得誣狀囚捕逮張甲甲遁李乙訴竟道曰幸遇許公不然死矣及爲招遠適大水兼值縣試履災衡文不敢自逸遽中風卒著有六潤齋詩存子慶常字彰有號吉士晚號柳村居士廩貢生以文名嗜遠遊足跡半天下著有小六潤齋文存詩草楹聯分編慶初字書雲虎變次子庠生性純孝居喪以哀毀卒慶義字熙屏虎變三子庠生爲詩文悲憤感慨自成一家言嘗與曹邑謝焜張咸之諸名士結爲詩社以風雅道義相劘著有種香山房詩草

節錄神道碑

蔡文懋字郁旃考城董堂村人生有異稟狀貌雄偉聲若洪鐘家素封慷慨好義咸豐初洪秀全踞金陵捻匪李士林等巢穎毫連年擾豫邊陲八年春考邑舉辦鄉團

舊城方以文懋董其事以許蕙副之建議先築寨以備不虞塹河道故隄分段扼守無事謹斥候精簡閱賊來整軍以待九月匪及考城境載所掠輜重行至白茅集文懋卽約曹縣團練截其輜重牲畜甚多當是時豫匪皆與毫匪私通假以金繪旗幟揭竿一呼亂者四應居民退保寨中匪夥多方煽惑順逆向背之機在呼吸間文懋招集父老譬陳利害誓以死守又訪知匪徒姓名斬渠魁以徇羣情始定卽與同邑張世貞吳運成諸團爲犄角勢有鄭六廉者聞僧親王駐師濟南僞爲乞丐間道冒雨雪往請師師至文懋率衆迎謁王奇其才時軍中缺馬適邑購馬數百匹自北來文懋驅以獻王擇其尤者以充軍用十年九月張樂行糾合粵匪北掠山東郡縣至豫邊慶廉遣趙書升率蘭儀栗麟書王璽考城營蔡若珍旣文懋越境追殺匪遂去王委文懋守隄曰此重任也十一年與總團張世貞等至曹縣魏彎遇匪爲所敗世貞死之文懋等以智免後張曜宋慶駐考剿匪皆重文懋詳其事於朝得旨以知府儘先補用賞戴花翎晚歲闢一別墅黎明卽起課僮僕種樹蒔蔬未幾卒許蕙字仲

芳許河寨人博士弟子員無志功名嘗語人曰治世尙文亂世尙武若終身老筆硯間不知弓馬何以保全身家捻匪亂衆推爲副團長又曰自古用兵之策不貴先謀進取貴先謀退守若欲堅守非築寨不可衆皆悅從而清僧親王亦遣兵至召蕙稱獎不已爲請賞五品藍翎以縣丞用且表其宅曰保障一方

豫軍紀略及採訪

吳運成字文舫世爲考城人任江西南昌縣丞署分宜縣知縣罷官歸田時皖匪跳梁跋扈屢犯考城於是糾合鄉衆爲自保計凡器械糧食之屬皆自備什物技擊之事皆自習視唐代子弟兵宋時忠義社大約相同與同邑蔡文懋張世貞諸團作犄角勢互爲聲援俾一方有所恃以不恐及事之殷也匪等紛至羣來驅衆若外擬爲久困之計且以危言蜚語迭相恐嚇運成屹然不動守志彌堅雉經未殊乃置毒懷中與家人永訣其家亦各藏毒物誓以死守旣而僧親王至圍乃解王爲請於朝賞戴藍翎光緒十四年五月十二日卒於家

錄署分宜縣知縣吳公碑

忠義傳

江 祐 弟觀附

江子一 弟子四子五附 藍 欽

楊國臣

楊 茂

孫尙先

王廷倫

王之傑 子夢寶附

侯 社

孫 忠

王廷俊

鄭六廉

戴恆清

張克欒

張 鈴

許 榮

師咸峨

趙 芬

馬連中

張世貞

陳萬育團

馬建仁團

張良欒團

蔡大全團

袁龍雨團

呂金堂團

王魁標團

侯金倫團

師配道團

甯文明團

師繼孟團

趙儒傑團

傅文忠團

宋立山團

孔昭譜團

楊玉林團

程耕田團

高鳳嶺團

袁守倫團

王融資團

司忙團

王裕德團

張國安團

郝登治團

馮西坡團

吳貢南團

薛世勳團

秦家桂團

蘇景春團

趙瑞英團

王衍修團

宋固然團

張應昶團

秦永路團

申俊團

張河清團

邵福增團

胡怡堂團

董子琚團

侯邦彥團

鄭岷山團

王永惠團

杜心和團

田運

李荆璧

孔憲震

柳澤

張怡坤

王漢臣

張孝祿團

本在師繼孟下前遺此補

齊

江祐字弘業濟陽考城人祖遵寧朔參軍父德麟司徒右長史竊姑爲齊高帝兄始安貞王道生妃追諡景皇后生齊明帝祐少爲明帝所親恩如兄弟明帝爲吳興王以祐爲郡丞後除通直郎補南徐州別駕明帝輔政委以腹心引爲驃騎諮議參軍領南平昌太守時新立海陵人情未服祐每說明帝以君臣大節明帝轉顧而不言明帝脾上有赤誌常祕不傳既而祐勸帝出以示人晉壽太守王洪範罷任還上祖示之曰人皆謂此是日月象卿幸無泄之洪範曰公日月在軀如何可隱轉當言之公卿上大悅會直後張伯尹瓚等屢謀竊發祐憂慮無計每夕輒託事外出及明帝入篡議定加祐寧朔將軍明帝爲宣城王太史密奏圖緯云一號當得十四年祐入帝喜以示祐曰得此復何所望及卽位遷守衛尉安陸縣侯祐祖遵以后父贈金紫光祿大夫父德麟以帝舅亦贈光祿建武二年遷左衛將軍掌甲仗廉察四年轉太

子詹事祏以外戚親要權冠當時魏軍南伐明帝欲以劉暄爲雍州暄時方希內職不願遠役投於祏祏謂明帝曰昔人相暄得一州便躋今爲雍州儻相中乎上默然俄召蕭衍謂曰今使卿爲雍州闔外一以相委祏旣見任遂遠餉遺或取諸王名書好物然家行甚睦侍子姪有恩永泰元年明帝寢疾轉祏侍中中書令出入殿省及崩遺詔轉尙書左僕射祏弟衛尉祀爲侍中皇后弟劉暄爲尉與始安王遙光徐孝嗣蕭坦之輔政誠東昏曰五年中汝勿厝意過此自覽勿復委人及卽位祏參掌選事明帝雖顧命羣臣而意寄多在祏兄弟至是更直殿內動止關諮永元元年領太子詹事劉暄遷散騎常侍右衛將軍帝稍欲行意徐孝嗣不能奪蕭坦之雖時有異同而祏堅意執制帝深忌之孝嗣謂祏曰主上稍有異同詎可爲相乖反祏曰但以見付必無所憂左右小人會稽茹法珍吳興梅蟲兒東海祝靈勇東冶軍人俞靈韻右衛將軍豐勇之等並爲帝所委任祏常裁折之羣小切齒帝失德旣彰祏議欲立江夏王寶玄劉暄初爲寶玄鄂州行事執事過刻有人獻馬寶玄欲看之暄曰馬何

用看妃索煮臠帳下諮暄暄曰且已煮鵝不須復此寶恚曰舅殊無渭陽之情暄聞之亦不悅至是不同祜議欲立建安王寶寅密謀於遙光遙光自以年長屬當鼎命微旨動祜祜弟祀以主少難保勸祜立遙光暄以遙光若立己失元舅之位不肯同故祜遲疑久不決遙光大怒遣左右黃曇慶於青溪橋道中刺殺暄曇慶見暄部伍人多不敢發事覺暄告祜謀帝處分收祜兄弟祀時在殿內疑有異遣信報祜曰劉暄似有謀今作何計祜曰政當靜以鎮之俄而召祜入見停中書省先是直齋袁文曠以王敬則勳當封祜執不與帝使文曠取祜以刀環築其心曰復能奪我封不祜祀同日見殺祜任寄雖重不忘財利論者以此少之祜等既誅帝恣意遊走單騎奔馳謂左右曰祜常禁我騎馬小子若在吾能得此因問祜親親餘誰答曰江祥今猶在也乃於馬作勅賜祥死祀子景昌位晉安王鎮北長史南東海太守行府州事祀弟禧早卒有子獻字偉卿年十二聞收至謂家人曰伯既如此無心獨存赴井死和帝中興元年贈祜衛將軍祀散騎常倚太常卿

南齊書

梁

江子一字元亮考城人晉散騎常侍統七世孫父法成奉朝請子一少慷慨有大志家貧以孝聞苦侍養多闕因終身蔬食仕梁起家爲王國侍郎奉朝請上書言事爲當軸所排乃拜表求入北爲刺客武帝異之又啓求觀祕書閣武帝許之有敕直華林省其姑夫左衛將軍朱異權要當朝休下之日賓客輻輳異不爲物議所歸欲引子一爲助子一未嘗造門其高潔如此爲遂昌曲阿令皆著美績後爲南津校尉弟子四歷尙書金部郎太同初遷右丞兄弟性並剛烈子四自右丞上封事極言得失武帝甚善之詔曰屋漏在上知之在下其令尙書詳擇施於時政左戶郎沈炯少府丞顧瑱嘗奏事不允帝厲聲呵責子四乃趨前代炯等對對極激切帝怒呼縛之子四乃據地不受帝怒亦歇乃釋之猶坐免職及侯景攻陷歷陽自橫江將渡子一帥舟師千餘人於下流欲邀之其副董桃生走子一乃退還南州收餘衆步赴建鄴見於文德殿帝怒之具以事對且曰臣以身許國常恐不得其死今日之事何所復惜

不死闕前終死闕後耳及城被圍開承明門出戰子一及弟尙書左丞子四東宮直殿主帥子五並力戰直前賊坐甲不起子一引稍撞之賊縱突騎衆並縮子一刺其騎騎倒稍折賊解其肩時年六十二弟曰與兄俱出何面獨旋乃免胄赴敵子四稍洞胸死子五傷脰還至壘一慟而絕賊義子一之勇歸之面如生詔贈子一給事黃門侍郎子四中書侍郎子五散騎侍郎侯景平元帝又追贈子一侍中諡義子子四黃門侍郎諡毅子子五中書侍郎諡烈子子一續黃圖及班固九品并辭賦文章數十篇行於世

梁書

明

藍欽考城人廩生性剛毅流寇攻城急諭以大義爲賊射死

陳志

按歸德府志載明末殉難諸人姓名考城四人首藍欽不言其何以死查陳志欽列楊國臣諸人前國臣嘉靖時人欽猶在其前其非明末可知侯廷祐陳志不載其死難孫尙先亦嘉靖人惟侯社崇禎四年爲流賊所害府志不加分別而統稱

之曰明末殉難何其疏也

楊國臣考城人嘉靖改元流賊王鑑攻城臣糾合邑人立條約備器械登陴以待既攻急率衆悉力拒守盡出家藏以餉守者賊卒平

陳志

楊茂考城人嘉靖初年流賊作亂攻考茂護守南門晝夜巡視賊望而畏之遂不能下

陳志

孫尙先考城人嘉靖二十八年賊圍韓學莊甚急其父學仕率衆往救鄰里爲賊殺尙先奮不顧身獨自持槍刺賊以報父讐亦爲賊所殺聞者無不慟之事聞俱加恤

獎

陳志

王廷掄字用我考城人天啓四年舉於鄉崇禎庚辰成進士初任山西平陽府洪洞縣調山東濟南府利津縣知縣崇禎十七年三月二十九日聞闖逆之變忿恨嘔血卒於任爲人沉靜寡言笑不喜交接文章名一時

採訪

王之傑字斗南考城人剛方信義遇邑公事敢言敢爲一日被賊縛怒罵卒被害其

子夢賚廩生也見賊害其父拔刀出戰良久不勝至死罵不絕口

陳志

侯社考城人崇禎四年賊劫其伯父侯維藩將殺之社奮身往救維藩得脫社爲賊

害知縣鄭某額曰殞身救伯

陳志

孫忠考城人明崇禎十三年李自成攻汴掘黑岡口考城嚴戒忠率衆守禦及賊將嚴步武攻城忠出迎戰力竭陣亡邑人義之呼爲孫將軍清道光八年知縣吳拱辰奉其主於城隍廟中記其事顛末於下光緒十五年知縣呂耀輔復爲立祠

錄吳拱辰題孫

將軍
木主

王廷俊考城人爲陰陽訓術與典史雷動爲友動明未赴京改選託妻俊家值許定

國據城俊闔家已逃城外因動妻未出攜子復入衛之賊怒俱被殺

陳志

清

鄭六廉字子介考城人性慷慨好義舉咸豐中葉捻匪猖獗睢考等處悉被蹂躪鄉團屢戰不勝官紳束手意欲請師僧邸道梗無敢行者六廉僞爲乞丐齋公文赴濟

南求救僧即遣兵至擒匪去賞五品頂翎知事張延齡遊擊蔡若珍獎曰函身紆

難 探訪

戴恆清考城人以信義著咸豐九年九月二十七日擒匪突自南來村人不及逃避倉皇無措恆清即率鄉人列洛陽工埠口堵禦匪至奮鬪身中二矢猶酣戰遂遇害

探訪

張克樂考城人咸豐十年山東焦桂昌董執信攻考城克樂率團勇禦賊戰輒勝至睢州壩力戰不支遇害 探訪

張鈴字季睦廩貢生考城人咸豐十一年禦匪身亡同邑監生張鐸增生孔昭華廩

生張峻高恩貢生唐瑾王允執亦先後死事 探訪

許榮考城人義勝會團勇咸豐十一年四月與擒匪戰於董堂南被獲不屈死 探訪

師咸峩字峻峯考城人咸豐十一年正月匪亂禦賊被獲不屈口裂舌斷死 探訪

趙芬字如蘭考城人咸豐十一年隨團禦匪陣亡 探訪

馬連中考城許河寨義勝會團勇有胆氣咸豐十一年九月十一日與東匪戰於曹屬魏灣身被重圍中數傷猶力殺數賊不屈死

採訪

張世貞字正齋考城賀村方張莊寨人監生清恪公裔幼讀書知大義性情豪爽有傑士風咸豐九年秋皖匪北犯欲越長堤同邑人共結鄉團以禦匪任勞任怨躬督其事毀家紓難親身簡閱遂削堤爲壁沿堤爲濠又以人心不一爲之訐姦禁暴扶弱抑強一時號令嚴明各團歸附十年三月捻匪大隊復來窺堤世貞帶勇防剿親歷行陣並約各團以爲犄角糧餉不足令家中老少親自炊爨以給軍食捻匪無隙可乘南竄去復慮賊踪無定激勵衆志以圖後舉計一歲中越堤剿匪如曹郡之韓集安陵集金堤頭曹州單縣定陶火星台礪廟集又如儀睢高小集考城流通集凡有警報靡不慷慨任事轉戰無前大府嘉其義以爲考邑團總賞五品翎頂使之防河十一年正月十一日長槍會勾結皖匪自東北入堤世貞聞信帶隊北迎二十里與賊遇奮勇直前麾戰三日殺賊數千賊始越堤去是時會匪爲難皖匪又不時來

居民無自存活因集衆議築寨修濠與鄰境鄉團爲聲援並辦南岸防河事夏四月會匪串通焦國昌李遷李標等樹旗爲匪威脅東方各寨領旗從逆世貞乘夜親赴考城曹單縣各寨密探消息經十八晝夜往反七次期各團以同心協力誓不從匪曹考各團以爲保障至八月逆匪董治信等盤踞曹邑之魏灣相距數十里衆以農事方殷日切焦思欲會各團襲滅之適奉考城縣張延齡暨巡撫嚴玉樹森命會通各團同陳參府協力進勦遂於九月十一日寅刻行抵魏灣西南與賊遇交戰未幾賊敗退追至魏灣寨濠四面團攻賊乃傾巢去世貞以前隊殺入相持正急突遇賊援兵至勇衝作兩斷世貞身罹重圍勇氣百倍奮不顧身竟以矢亡援絕北面自刎亡年二十六歲當道者以其事聞得旨賜卹建祠俱亡者田福倉田光明田萬倉田

光四

悉奔牛樓人節錄張公祠碑

陳萬育考城人爲團總咸豐九年九月二十八日與賊戰於長垣新興集敗陣亡者陳致遠陳鵬德陳鵬格陳致恭陳科張壇丁鳳翔張翊王進忠王耕田王耕仲王二

胖趙望成張有聲邱滿圀丁魁元劉立張遂李虎胡禮敬劉得郎胡禮元李桂花王

進孝徐虎

以上團丁

吳軍理

湖北人商陳集

韓年

長垣人寄居

楊進功

滑縣人商陳集

張光先張光榮國興仁

李夢筆謝孟惠翟景舜

咸豐九年九月二十七日在大堤上陣亡

周尙玉

咸豐九年九月二十八日於本村遇賊被戕

吳連中

長垣縣人寄居考城西關九年九月二十八日在本地方遇賊被戕

王繼山考城愍廟村人咸豐九年九月二十八日

與賊戰於長垣李龍莊與生員王青雲劉奇珍朱永嘉劉鳳翥劉士安曹永和曹永

亮曹明李文道王國柱

俱敗績陣亡

馬建仁考城張莊人爲團總咸豐十一年正月十三日與賊戰於賀村敗陣亡同死

者郭三吉孫廣財賈立志張廷標齊東陽徐貴王治國馬克敬杜寶貴徐興旺程牛

趙馬楊國修鄭假妮潘立正趙修立張成山岳秀德程天卓田平倉關文德王進忠

關占魁程道魁王潤趙廣倫趙永才趙永祿錢月義楊興道程五銀田和尚趙義善

牛中魁牛二麻

張良櫟字蔭南考城禱廟店人爲團總廩生賦性剛斷好義氣有胆略丰采俊偉人

多畏之咸豐九年皖匪擾境伊率衆與戰於流通集力絕被執賊欲降之曰吾何如人而降賊耶罵不絕口死陣亡者張建閣李大祥張克俊劉元成郭立志劉建方田鳳林欒忠智姜河之周運祥張心灼張克詡孟成史瑞雲譚興泗陳鳳瑞又有胡永祥宋莊人王肇本王莊人於九月二十八日遇賊被害

蔡大全考城人爲團練經制咸豐十一年正月十三日與賊戰於賀村集敗績死之陣亡者有趙清峯劉俊傑李廉傑龐進賢曲全會李四聞段中立羅五劉中魁楊顯明石進祿王朝選趙本初尹明遠潘登道劉文成王重輪袁霞光底化亭常桂林谷廷花孔廣森李蔭堂王東林王國瑞王長山王士逢趙廷弼田成咸林六韜程三王徵獻趙進才卞三興婁仁秦有福張大有孔憲池聶二黑何南奇郭茂林曲音亮汪墨然梁得重陳桂徐八申四申平安申五桂魏二魏六聶秀壁田三元張明德程興旺陳曰平梁大麻田好學程振清田中元王衢潘登雲王心亭田丑孫五臣楊在田王思仁楊俊高劉有才杜二王萬貞羅全喜王思功

武生

吳丹銘楊樹桂潘前緒王峻

嶺王戶楊甫田王法才田向善程法明王清河龍玉堂張明亮石卯杜連元田茂元
張成山張好善孔大雙張鳳魁程興旺郭繼祥謝尙忠田得冀賈智逢徐鳳鳴程妮
王萬年張四潘赫張礪潘登其孔月潘三程林王林王化德程大山王福臭黑傅拉
住郭舉才閻宏勳王見文范二麥孔昭珩閻中魁潘林郭孝德孫克義程學書李相
榮孔憲成程天運李禿之王魁元阮萬福阮金花李長興郭正元牛中魁牛祿孔廣
理王鎖住王志王麥銀山王可意劉法全王興功孔五劉松山張書善單宗孔王林
山單自法李報侯標李文孔來柱王逢恩耿印鄭大山管普會周玉成孔昭錦馬建
唐趙國章劉建邦劉清運田永清王榮先薛三安國柱張大柱張安朱蠻子曹三春
王寅姜五常孫三堂張二林劉春張念堂張洙淳李流柱李忠點李二月李國賢李
中正李二金譚花廷蘇元高法李克明李黑李三科李黑箕李金德郭秀生郭登元
毛根科郭成郭良興戴學禮郭鳳魁郭秀山郭丙張六郭映雪林國正馬廣輝張麻
三張太安張士亭張士田袁光有楊心傳楊國後李留妮楊元福李魁元孔昭行孔

憲桂王木孔慶泗趙毛孔慶連孔鎖張振嶺唐玉振唐三毛唐發田唐全唐石頭唐
章程三唐四張元翟鎖孔憲節魏希仁魏桂魏希元張應道馬福孔憲成楊榮聶訪
楊田張安稽二坡王五趙來興任二臭王三曲大曲江重曲全會曲禮賓王殿臣王
殿森劉萬采余振河楊鳳卜黃全貴劉成德司克敏申雷張二月曹浩然王立剛王
峻嶺王百川王勒王治國李大冬賈三魁單純單仲張景元李心魁張德懋王興緒
何象德李忠輝李忠孟田玉興張餘立孔昭融趙桂芳陰陽學訓李永昇榮嘉樂事聞賜
卹徐珊考城西關人與賊戰敗死之陣亡者有長垣人寄居堽陽寨胡廷祥劉復純
劉金重程邦彥考城孔莊人與程邦魁鄭邦明侯秋遇賊戰敗死之張廷元考城邵
凸寨人與朱法舜邵守先張兆德遇賊陣亡時杜村集王鵬翔閻馬在曹縣孫娘子
營亦被害潘永貴考城潘莊人與潘永福潘永魁潘永存潘永治潘永立丁孔貞馬
福山擊賊舊城東敗皆死之李逢時考城青陵岡人突遇賊與孫大順王鎖王金梁
王振功牛五李福王扭楊成林山俱被害

袁龍兩考城人監生爲團總禦賊陣亡時張孟禮張桂張怪張培緒張二黑張文喜申二楊學楊復振楊呼囊楊羣楊芳楊柱桑十王三皆死張餘步考城賀集人其子慶愷慶徵及其佃戶苗升魏守仁魏全喜魏七得甯喜順高仁同時遇害孔憲璽王中一亦不屈被殺害

呂金堂考城崔家莊人遊擊銜爲團總咸豐十一年四月十五日在董堂地方督團丁三百名與捻匪戰力竭陣亡同亡者呂仁性韓拜殿戴興賢蔡常允郝安汪來成韓文振康玉廷呂見基孫慈王廣田王木劉吉祥李仁馬敬先馬敬行馬太平趙永乾呂見安趙茂信張玉珍宋珊高士良謝中魁馬兆興楊雙喜

王魁標考城張家村人爲團總咸豐十一年六月十七日與賊戰於睢州壩陣亡同亡者關六董順宋家成朱得實王自學李有功林之才魏善道賈玉賈仁江忠蘇玉廣何進李孝先王得安趙得太申大勇羅宗仁羅註吳禮吳知和程五蘇成立底得禮張有功程連玉馮有爲王誠吳運心王學之王會之李心太趙愷程福王化遠申

明禮馬稱驥王枋胡天福鄭家修張喜張有智薛玉王文周周珩周心智宋得明宋克復韓在文徐天德朱本立劉四王善李永申其志

侯金倫考城張莊寨人爲團總咸豐十一年十一月與賊戰曹縣魏灣同陣亡者王明珠劉萬興李得重史武重吳運成王克山常青雲徐金亭魏振山王魁元阮金標王柱阮萬有陳道生阮萬年阮萬居周道平蘇啓李鳳春張福慶李鳳祥孫希英李森木朱進江劉振山楊永立王朝選陳萬年王朝興張廷元劉義興王中林羅煥章孟廣興趙興國杜行魁任德方杜流貴李柱杜連元楊峻嶺楊天高楊輔清羅全喜孔繁亮王玉瓶孔祥乾李德林張書善謝發財謝軍財程法明程朗清程國興程國旺程國山程耀章程克讓程國明潘鳳榮程國太馮四趙成可程允修王蘿葡郭七王清合喬君平喬太平喬斗李茂廷李茂花孔臬呂張德玉陳悅順楊逢春何鳳周謝心願單自治郭發有程行程賓董黑王愛臣王成鄧良輔考城李鄧莊人咸豐十一年正月十一日戰死陣亡李宏祺

二名山東荷澤人寄居

鄧良忠鄧獻瑞陳長信

師配道考城蔡成子村人監生爲團總咸豐十一年正月十一日禦賊陣亡俱亡者師繼昇任二雁任大雁任先孝任長柱朱雙喜張常福王正明張有德張繼善張性善師繼顏師咸莪師咸用陳成馬之章米新節蔡福重蔡坤元李春倉李友士李純任丕任大林任柱李興義勾六李成朱馬任二冬蔡希焱蔡希冉潘恩科謝六成蔡之義徐興遠任流呂魁爲王梅王桂林胡永元任經立任進財趙貴王雙喜王三周蔡振用蔡振答王之學周金山周士俊

甯文明考城舊城集人監生爲團總咸豐十一年正月十一日在本村與賊戰敗同亡者盧冠軍牛福裕馮又泗蔡心義潘元胡永義陳蘭吳懷印楊魁山朱培留馮二得王懷裕劉桐馬魁李小齊柱鐵洞孫儒王興蘇得進張表善與田運張廣安靳樹倫咸豐十一年正月十三日賀村大堤之戰陣亡孔憲明與宋麗山咸豐十一年正月十一日村南遇賊被害

師繼孟考城城子村人爲團總咸豐十一年正月十一日與賊戰敗亡同亡者師清

操朱秉乾李奏凱任占元任克能張立名岳賢才劉繼安王國棟遠鳴雁遠鳴修申保太魏名揚魏同山丁臘丁隨成劉成崔十振與王孝允李東咸豐十一年正月十三日同時遇賊被殺

張孝祿考城侯集寨人爲團總與張孝鈿張樸張忠謩宋芳張忠億宋魁宋第二潘來柱張興魁汪明陳永甯焦東辛三申牛郭正歲徐文德咸豐十一年正月十三日寨破投水死張忠贊張年張爾聚唐錫慶華忠聰亦於是日被害

趙儒傑考城人武生爲團總咸豐十一年正月十三日追賊陣亡俱亡者趙儒林孔繁經孔慶雲王希恩盧梅翟法祥韓才劉玉年劉玉崑張播司克儉考城人與張餘山張慶沂張景山張永山張敬亭袁希義張鳳亭馬孟居蔡松山張玉冕馬二牛馬面包張由魏成德尹其正張慶典劉玉方常文昇李三麻劉世才司文賓朱太豐朱雙喜位守先曹玉山朱太興張永康司文德靳法興翟二志王春江翟春林李國賓楊清廉張永福張永祿俱陣亡

傅文忠考城白樓王莊人爲團總咸豐十一年正月十三日與賊戰於大堤陣亡俱
亡者李九傅文郁張豆姜照太陳鳳羣傅景舜傅孟林傅太運張魁元王萬祥孔照
貞羅大秋傅二本柴保霜監生周錫廩生周家燮程樹楷程樹範張秉信韓玉興金解元
孔繁標王連昇袁計合卞林余得龍

宋立山考城人爲團總咸豐十一年正月十三日勦賊力竭陣亡俱亡者張羣楊二
楊三張柱張珍劉甫趙夢筆耿柱王三王廷柱劉鳳春王世先王繼東宋恩彥宋華
袞陳萬成

孔昭譜考城土山並劉莊人爲團總咸豐十一年正月十三日禦賊被害俱亡者孔
昭訥張國順孔慶位彭廣貴孔憲金靳天申楊玉清楊重華孔慶夫于中坤張二成
郭增福耿三重郭耀德陳忠陳興龍玉堂宋朋雨宋榜張時來楊拖天楊清魁田元
司玉楊玉立楊胖劉心荷梁殿元張齊閻金梁

楊玉林考城人爲團總咸豐十一年正月十三日與賊戰于河堤陣亡俱亡者徐心

年徐臨河徐四高進財徐玉琴胡金吾趙貴張年李大漢徐鎖徐改生徐二運徐三任二漢徐二堯徐興聚徐林徐二道徐五輩徐和尚徐元法劉廣興胡三元楊立麥張有福孔慶國楊義楊立志賈鳳林李奉林秦萬德鄭冀楊玉清徐心忠趙文珩孔慶元趙文成張奇亮趙文興孔慶吉張培思鄭大喜孔昭林張三年張建牛天和張天祥翟義彰翟煥彰翟尙廉翟尙昆翟孟翟法魯翟衍翟月翟二遂翟明翟中時翟尙惠翟駢翟二東苗天和秦黑炭汪義楊二小牛得林申運申平汪黑汪二小宋景運何三怪聶進福魏南文徐八妮郭七孔慶山徐登榜

程耕田考城程家寨人爲團總咸豐十一年正月十三日與賊戰於河堤陣亡俱亡者趙馬徐二妮王固杜先榮楊國安蕭金聲郭雙杜景聖董金榜程寶貴馬楨祥杜景樂馬克山馬發財張滿堂馬書印段茂德羅應貴史成徐旺胡虎甯國柱吳知明王心太王二安張安考城邵凸村人咸豐十一年正月十三日在村南大堤上陣亡俱亡者任四王二妮楊純修姬波張大欽楊守文楊書聲袁法舜王麻子任興任文

鐸聶四妮楊進功張四邵合張流劉柱張大流郝君選魏犬服翟永太湛清波王俊
王二歪楊德修邵應賓

高鳳嶺考城三合義村人爲團總與高墨然車鳳崗曹秉欽張常張重咸豐十一年
正月十三日擊賊陣亡

袁守倫考城王莊人爲團總與姚進財王同郭景昇郭義田郭林田郭鳳朝郭成元
王西中王同閣郭秀鎖郭良士郭良山郭良會郭良炳郭秀蘭李二霜吳士吳三祥
仝萬金唐居安馬廣智侯燕桂孔憲典楊鳳山馬均國馬國興孔憲祥靳三趙振鐸
趙振安徐興遠趙景碩翟永安楊學成咸豐十一年正月十三日勦賊陣亡

王融賓考城張莊人爲團總與孔果趙二牛趙金壁趙文遠袁雙意張國賢張自便
翟振東田文廣史二朱廣興張慶錦底文興鄭六田二道陳鎖劉二麻張萬有張玉
明李進財張保住王喜林閻可意底廣文趙修烈張福元馬興張立柱史馱郭尾把
朱來柱張倫元高臨堤王心誠宋柱孝張之漢宋國安李峨蘇六李文科翟四劉四

海田自順李三趙進財郭秀榮郭二駟李文花李俊興李中和翟傳一王二麻王大木劉中元胡士清劉歪翟文明史道史道會陳文忠楊二咸豐十一年正月十三日禦賊受傷陣亡

司忙考城董莊人爲團總與司克勤王三妮項顯司采項賓靳登朱太和王妮項貴王松林朱太恆陳二輩項五魁王友仁朱太喜翟相輔王殿臣武留張允山翟九王協太李三司大山司文俊司文傑司克明翟二小王協中孫雲龍司克治翟羣夏金聲翟林王貴舟翟拉龐玉柱范三龐玉坤楊到然龐尹居張永祥王道範張鉄山秦太乙張永天秦十文梁五王得民孔廣修陳二王春閣崔記文程根張保王春山孔黑司鳳司登王雙印孔四龐新月李居信司二怪張振清鄭豹張狼王法柱龍金亭龍金魁龍光興龍套龍金鱗楊國星李有章王應林咸豐十一年正月十三日在大堤上禦賊陣亡

王裕德韓蕭波人爲團總與尹二王天立王成章孔昭文朱玉潤王珠牛妮張林波

孔昭楷劉米劉炳南張如山翟法魯翟珩孔憲立陳文坡蕭文興王茂楊進德田占元潘克道孟傳道底廣太李興旺李興林李建業潘俊安楊建清李成徐興林孔慶培王進魁潘五孔昭興張羊陳興魁王黑范三蔡長山王假妮孔昭寧余樂善李建功王占元王名田王連元王建業王心田孔廣貞孔廣武馬宗歧陳萬年王祥臨王得福王金閣隨得興隨意王立德王振安王治廓王治同楊玉立楊黑王路潘廉志馮賀年石進德石秋王有福常萬同常元王廷標王梅王意王廷重咸豐十一年正月十三日在村南大堤禦賊陣亡

張國安考城人爲團總與張士漢張大成海士見李麥張雲鵬張興張玉振張景睿張二妮張明亮郭云成郭爾印郭云祥郭二麻郭三郭景舜郭白郭柱劉黑楊狼楊七馬鳳儀馬克義馬克三馬廣德馬廣禮馬廣和楊二囤段雨萬育湛胖侯得林楊元林程遂妮楊心德楊心芳楊和尙楊爾啓楊萱楊心友楊大樓張賓楊學純邢黑韓樹張林選張道成盛二麻郭東韓對楊兵楊運祝袁光有成豐十一年正月十三

日在郭店村禦賊陣亡

郝登治考城張翟莊人爲團總與郝立孟王東峯周大惠王三畏何心炊何榮安何玉成王三翟玉亭陳克柱杜昆鏡田萬年王連元張進保何清平王平馬雲合趙存義杜雲祥翟二世李杜成立李雙成楊和馮十馮玉張宗合張培恩湛旺王三馬相林孔昭珠杜梅王成德張培成彭廣彩劉守智孔憲銀孔憲銅馮黑妮孔憲錫賈玉章賈牛孔憲容孔昭廷李鳴山孔廣鳳孔昭楨孔憲舒孔昭質孔憲謨湯金柱湯玉珍湛世旺胡萬寶鄭武羣畢俊賢張二張三王占元高二馬二林王文常王六李爽何寅張第大單歪祁六錢安劉黑李秋李三馬二元王有貴王瓦孔黑妮李國安唐忠義王二李標李文華孔光平賈二成宋東木劉米貴關平志魏學元魏羣張成標張德張師明宋秋成夏富來賈中文李文華郭增福孔憲中張明閣李勤問李名歧孔慶連咸豐十一年正月十三日在本村禦賊被殺

馮西坡考城人爲團總與錢安王占元何元起王文長單廣文李爽咸豐十一年正

月十三日在馬莊北剿賊陣亡左柏傅趙和朋亦在本村北遇賊被害千總馬宗魁考城石樓寨人與王金遂苗卜王大雪王春閣吳憲文趙玉柱趙連元咸豐十一年正月十四日禦賊被害

吳貢南考城侯集人廩生爲團總豐咸十一年正月十五日與王二喜辛安林吳書辛萬龍王玉田安勤于化龍趙林保孫麥李成韓喜張創子劉克勤司三樂張棚王俊山杜巍劉五胡金釘周富胡克太王克明張安宋心友劉振法王用貴薛閣馮和陳牛皇甫雨鄭偏朱魁德胡合胡清馬三王升張舒安韓禧李鳳石曹建李琚李金榜吳來朋楊世方王瑞林吳來彥吳來朝禦賊陣亡

薛世勳考城禱廟店人武生爲團總與張良聚張心慎張克傳郭山張良友陳懷興李士奇楊才梁序寅李貴廷薛孝仁曹興元孫鳳儀陳心智李漢平秦士劉苟陳額王來柱張早立楊金梁潘保成張廷三王心黨石心聞石守柱石映冬石映春曹繼明趙鳳廷王廷立孫玉廷馮振朝趙世祝李永瑞田有明王家貢王衍瑞李成侯成

立劉戍陳振山陳明恩張本樹王喜柱張心廣李景玉劉元成張廷學田玉德姜河
李三春聯中治張克諒張良春李運來黑永信劉士福張遂潘興龍簿玉參朱廣林
朱成元劉瑞玉賈中和朱廣營趙中長李文安韓清池王方郭玉周常張元成豐十
一年正月十七日禦賊陣亡萬金標雷寨人亦於是日遇賊被殺

秦家柱考城秦老莊人爲團總與李英潘九齡杜有喜杜廷林秦延霜田福興趙第
二吳鳳陳二吳保申成義鹿景華成豐十一年正月十八日陣亡

蘇景春考城許河寨人爲團總與謝金魁鄭天成戴魁標戴德全王作佳趙芳川王
憲武王玉王春田王山王際坎鄭均蔣萬金鄭德憲師和尚李進才馬保金鄭國梁
李法啓董廣興劉俊峯成豐十一年四月十五日陣亡

趙瑞英考城李館寨人縣丞爲團總與

監生

趙安清趙蔭趙際平韓有智李景梅李景

禹李清泉李清淇榮卓立王奉福王赫鄭魁李經綸湯振山韓尙友趙瑞來董雙魁
羅德劉東春單逢原朱景榮李書明李文清董玉鏡李大興李清舉李燦李生春李

克志李敬寅趙來賓韓廣修王開禎李振海董世範韓廣典李書俊李興邦趙六成
董希孔陳常信呂振江張文興咸豐十一年四月十六日禦賊陣亡張堃馮三趙鎖
俱張莊人咸豐十一年五月二十三日遇賊被害

王衍修曹縣人寓考城王橋爲隊長與戴興仁戴惠仁戴德高玉謝化魯馬順李福
咸豐十一年六月十七日陣亡劉貴東明縣人寓考城王橋與戴守禮賀三趙成方

崐玉吳祥宋得舉林魁林有年林之傑何成羅克仁周之彥孫祺趙百順劉五咸豐

十一年六月十七日在睢州壩陣亡監生白玉峯監生張心海張雲成旗牌趙世魁李德武

焦德行王蕙田李白明胡安棋史明善孫昇焦來復劉道清陳合坤孫山雲文魁劉

雲彩李剛汪陸谷采蘭王學顏何占魁程德元馬乘時申二劉廷馮月張九根李文

安張臨亭趙德善韓石頭孫周李倫周文憲史雙月吳清臣鄭安仁孫利仁李得義

王得魁王得一趙智趙賢馮自立高文魁高行已王國玉何德秦自德張用之李慎

周三趙志成高文傑朱思孫成義賀文成焦忠友俱係睢州人寓考城王橋寨均同

王衍修禦賊陣亡

宋固然考城人爲團總與張鳳竹崔上林李芳年陳永興周敬堂王邦林王金全曹三歪楊和順王有田馬德立趙立志汪明德孟大月王二根李全李獻文李宗孔李順李克運李學成李德清王繼先張汝霖劉三星曹永含裴三劉伏楊得清張大朗范五輩陳文書周鳳運張鳳祿王相君李玉山夏秉忠李保元董振科咸豐十一年六月十八日在長垣境三春柳集禦賊陣亡

張應昶考城人爲團總與張紹庭張聖謨曹三春孫庚午劉守田蕭芳芝潘起鳳羅萬福王萬育王璧劉中元余兆祥秦貴張良貴張萬興蔣東岳王玉山之璧李清言馬文學蕭函三陳貴王玉萬王本立夏四月王文清譚道方王五妮常治業林五許分木蕭家順宋黑陳鳳林張二白張尙經張新柱張四功張四美楊科舉蕭家安馬長健咸豐十一年七月十九日在杜樓寨外禦賊陣亡

秦永路考城人爲團總與王作玉李文明張亭代名高秦同興王際康劉鳳山王金

榜張振範任金貴穆金山秦延錦秦延軍秦延章咸豐十一年八月初四日在新興季口村禦賊陣亡

申俊考城人爲團總與李敬胡運清程繼均陳貴德李魁五韓二興宋欽功李玉龍田中成鄒生彩王克時咸豐十一年九月十一日攻曹縣魏灣力竭陣亡

張河清考城人爲團總與趙鵬舉王開禎董蘭張範劉克仲黃金榜杜國昌李凱崔喜振李傑陳東山李心平謝文虎董名楊賈魁元王祐王祐許五經馬治安董文濤關進德張華國蔡大用謝雷恩郭和尙趙成劉本固趙成萬馬連中許慶榮周振山李萬有馬林李鳳朝何玉韓有萬文春吳思忠陳盡忠陳耕田陳新節史萬年韓有興韓喜謝遂恩王紹曾胡士信咸豐十一年九月十一日攻曹縣魏灣陣亡

邵福增考城人爲團總與賈成武輩朱廣廷程興歧宋玉成朱惠趙心安朱檢朱丕榴朱永愷王士成趙雍義蘇德進潘景元劉桐劉梅馬果蔡文德底武城尹玉振羅應柱咸豐十一年十一月二十三日在吳莊寨陣亡

胡怡堂考城人爲團總與胡永貫胡顏堂劉敬禮胡敬堂張狗張芹同治四年三月初三日追賊陣亡

董子踞字子佩考城人爲團總與董三省文建功張建元王敦張永梅張克功余林許大年郭建黑董三玉董武約周士俊李臨朝周金山黃邦選謝逢恩趙成貴王得法同治四年三月初一日在董堂遇賊被害

侯邦彥考城人爲團總與劉喜柱王明祿呂良樞劉智唐誌劉化成張忠泗張忠茂石心智張柱趙喜呂成鎔焦王士玉張文亭申林王二怪同治五年八月十九日在傅村塔侯焦巷戰力竭陣亡

鄭岷山考城人增生爲團總與程正性程京山程歧山程至性程玉山程天法程夢周程鵬飛程天孝程富清程貴清程二年李中立劉金城趙滿常程耀清趙仁程四臣高三程潤程峨連程國柱李修董振清鄧六桂張廉張登程斗程天庚程長清張天愷張合清程連程重張臣善張星山張二序程天緒湛金梁湛清山湛福順王喜

趙全善趙可善趙安趙喜來趙冬劉金山夏青雲李二虎孔雙桂劉王標牛奎牛三
牛祿牛馱趙亮義孔二運孔三運孔麥孔二能李四牛二來趙毛劉興林孔可意孔
車趙雪張滿囤張有運張有軍張二萬張三萬劉鉄頭閻林閻唐保夏鉄頭夏得平
夏普雨單宗文單宗道單宗鐸單啓善王建文單宗華郭舉才單雙單宗德單二麻
王興家王茂德王立河王進忠程天爵程天福管二亂張士清李平孫牛馬宗賓賈
煥之程法程齊三張麥郭鳳林徐香潘霖澤何鳳翔李二狗張二路田世平田丑龍
玉堂龍廣金陳鳳林閻五程潤成戶廷才趙五輩陳三程允執馮興旺謝成才謝進
才翟鳳鳴杜連中杜連成孔繁勳潘鳳榮梁進魁程玉陳花貴程克讓孟繼中鄧福
貴程麥成孫國興程發旺程國邦程和尙程發興趙中亮趙修魁王五魁王榮汪玉
木趙三元王國趙太平藺得權趙二平司引山藺二秋趙福林趙丙趙化林田旺趙
管趙鬧田三趙國珍趙六春田玉振田培金田玉堂李中喜李玉周李振德趙柱趙
東岳趙俊標李羊聶治興司喜司玉年聶馱曲和尙張習善張成善程萬清張英程

三麻張玉成趙魁元張麥貴趙三牛趙化民李繼廷趙化南趙雲從趙黑趙甲戌趙
雙張秋趙玉三王二成田二虎趙四妮歲趙太運劉興林馮培元李興林李大春王
玉王喜張廷相張魁元張海劉和湛世春湛寶安梁三妮王忠友王四王二貞潘登
崎潘二喜潘登科潘二莊潘虎潘二小潘興吉潘鳳聲潘振家潘雲秋張清元潘秋
貴潘玉安潘春張清太戴振東潘雲來王家樂潘雲祥潘雲清王年潘全成張名揚
李義鄭大鎖鄭六岳興岳馮王治家潘登榜潘有岳三馮楊茂嶺楊銀王俊嶺楊曰
明王治和曹安邦曹中立徐貴林羅盈王家祥王浩田桂王茂王白王魁阮廷標劉
振東阮成楊馮李得林阮金光俞存龍張天耀杜國珍周文仲周三喜王廣立王居
王順王松林王四王牛張清標岳秀林王林王鎖石中華王松平王松義張好善秦
思孔曹元郭法成田清高石留劉居梅程繩光扈德茂程受連程林扈雲章孔昭陽
扈雲路張清林劉魁元張福清王墨然張繼善王三張磨閻三程亂程三程景侯朝
棟李習珍李大黑李二黑李玉山程潤秋張石程南花曹四袁五魁袁兆祥孔昭閣

張明德王清河王清江王治國李文閣李允倉田好仁田步玉田心平田好學田金山李治玉孔昭元孔三孔來成孔大山孔寅魏雪孔昭朗趙運五趙十一趙修德孔憲成孔喜李進三李時雨孔院孫無名單二李丙田杜根李允平孔安程有名魏各句扈守義單喜張取善張揚善張陳善張餘成張登張盛德張餘立和沙禮曹萬年杜媿曹振邦李五曹七鄭煥章單宗書鄭嵩山單宗賢耿忠信單至立王鳳思孔來柱賈陳耿金聲王林山劉法興張豆李天之李天申俞中孝鄭聲順侯四王二麻孔昭政侯標孔丑孔昭連孫仰之孔憲中楊德金管普會李天祿張平玉位行姜法魁范四德邱玉林李景周馬進于徐文燦王連三李璵咸豐十一年正月十三日剿賊大堤陣亡孫二敬王興緒夏秉書潘花山張鳳梅李國祥俱墮陽人咸豐九年九月二十九日被害

王永惠考城官柳園人爲團總與張樂貴生員王金甲王永舒趙福元董四李春董五

陳二五咸豐十一年九月十一日禦賊陣亡

杜心和考城杜樓人爲團總與王得魁張鳳魁王起法蔡永信杜臣和杜希春咸豐十一年九月十一日在李館寨陣亡

田運考城斧牛樓人咸豐十年正月十三日遇匪自縊

李荆璧考城趙寨人監生成豐十一年九月二十五日遇賊被害

孔憲震考城翟莊人武生同治元年四月十八日赴睢州龍塘崗爲僧王輸送糧草至史村舖遇賊被害柳澤考城塌陽集人增生同治元年四月二十三日在東明縣

王莊遇賊被害

張怡坤考城郭店寨人同治五年十月二十七日在曹境金堤頭遇賊被害

自陳萬育至此

悉錄考城禮房陪案
俱得旨入忠義祠

民國

王漢臣考城人把總銜任商水縣隊官民國二年同縣長曾某擊賊俱陣亡周口鎮建祠立碑以彰其功 採訪

